

Labari kpa n bo YOHANE akerε i ni

Yesu ti Nɔaniε n bo i ma ηγγɔɔ n a

¹ Kana Nyεmε ba yi durunya ni, be woori bεrε bo bu fere i ka Nɔaniε. I ni Nyεmε woori bεrε a. Yiri Nɔaniε ni ti Nyεmε a. ² Fite i bumboori n kerε, yiri ni Nyεmε wo bεrε a. ³ Na Nyεmε ama Nɔaniε n ayi deke n kerε. Deke be wo má bεrε bo wɔ yi má i. ⁴ Nγγɔɔ fite yiri Nɔaniε ni dɔ a. Nyini ηγγɔɔ ni fa wein ba tekeeri adamande nyi a. ⁵ Na wein n aje awosin nu, na awosin n akoro akunma má wein ni.

⁶ Nyεmε yo sunmaari sɔnɔ be, bu fere i ka Yohane. ⁷ I baari ka i ba di nyini wein n daani wɔ, na i kan i jɔrε kere minεm, adena sɔnɔ kerε bo i tiiri kabo i kan ni, na bu daari nyini wein n ηu. ⁸ Yohane n mmɔɔ ni i tii yo ti má wein ni, ama, i baari ka i ba di wein n daani wɔ. ⁹ Nyini wein ni ti wein nahɔrε su n a, bo wɔ ba durunya n nu, na i teke adamande kerε nyi.

¹⁰ Yiri n bo bu fere i ka Nɔaniε n yo woori durunya n nu wɔ, Nyεmε faari yiri yiiri durunya n a, haari ni nyini n kerε mmɔɔ, durunya n nufɔm asi má i. ¹¹ Na wɔ ba i tienngu dεε asien n su minεm dɔ, na ba kete ka bu de má i. ¹² Ama, na minεm kerε bo bu deer i, na bu daari i ηu ni, na wɔ ma bu atin ka bu kaaki Nyεmε nbaam. ¹³ Bu Nyεmε nbaa kaakiiwam n ti má ka bu wu

bu ni adamande mbunja a, nzen má nyini, i ti má ka bieso ni bara sanja a ye bu wu bu a, ama, Nyeme ni i tii, ti bu Si a.

¹⁴ Na yiri Nɔanie n akaaki adamande aba awo ya do. Ahoroma ni nahore wo i do beberebe. Ya nu i jirima woowa ni, nyini jirima woowa n ye Nyeme afa ama i Wa kun n kpein n a.

¹⁵ Yohane diiri i daani kereeri minem, na wo tien ase ka, “Nyini sono n bo m yo seeri am ka i wo m sin suba na i tara m fieo n lee, dama kana bu ba wuuri m ni, yiri wo bere wo.”

¹⁶ I ahoroma beberebe n dee ti, ye ya di i ahoroma, na ya toko di i buka su. ¹⁷ Nyeme yo faari i nɔanie kpamaawa ni maari Moyisi ka i fa kere Yisarelifom, ama, Yesu Kristo aba ka i ba kere ya kabo Nyeme ahoroma n ni i nahore n ti barasu wo. ¹⁸ Be nya nu má Nyeme, má ka i Wa kun n kpein n bo i ni i Si Nyeme n ti kun ni, na i wo Nyeme do ni, yiri ye wo kere ya kabo Nyeme ti a.

Yohane Nyeme Nzue Biefɔ n daani diiwa ni

¹⁹ Ahin ti daani diiwa n bo Yohane yo diiri i, sanga bo Yudafom nkpienkpienm n bo bu wo Yerusalem mie kpiri n nu n sunmaari Nyeme sayoowa donguyofom ni bu bukafo ka bu ko bisa Yohane ka, “Woro la nma a?” ²⁰ Yohane afie má bu jore be su, na wo kan i kere kpain akere bu. I na, “Má mini ti Kristo ni, Tiidefo n bo Nyeme na i sunma i n a.” ²¹ Na ba bisa i bekun ka, “Ye woro la nma a? Woro ti Nyeme nɔanie kanfo Eliya n a?” Na wo se bu ka, “Má yiri la mini.” Na ba kaaki abisa i ka, “Woro ti Nyeme

noanie kanfo n a?" I na, "Ai." ²² Na ba sa su abisa i ka, "Ye woro la nma a? Ma ya noanie na ya ko se bo bu sunmaari ya ni. Woro na, woro la nma tenle su a?" ²³ Na wo se bu ka, "Sono n bo Nyeme noanie kanfo Esaya yo kereeri i jore ka i ba subo ndoori boro kpantain nu n ka, 'Am yo Mibie n atin n dongu.'

Yiri la mini."

²⁴ Minem bo bu bisaari Yohane bisaawa ni, Farasifom bo bu ti Yudafom asese be ni sunmaari bu a. ²⁵ Na ba kaaki abisa i ka, "A na a ti ma Kristo Tiidefo ni, a kaaki ti ma Eliya, na a kaaki ti ma Nyeme noanie kanfo n ni, ye nzu ti ye a bie minem Nyeme nzue a?" ²⁶ Na wo bo bu nu ka, "Mini bie minem Nyeme nzue wo. Ama, sono be wo am nu fen bo amberere si ma i. ²⁷ I wo m sin suba, m ti kaan ni bo m dodo i mmoo." ²⁸ Ahin sa n kere yo yoori mie n bo bu fere i ka Betani n nu wo, i wo Yodan kunma n wie afiri, deke bo Yohane yo bieeri minem Nyeme nzue n wo.

Kabo Yohane na Yesu ti Nyeme bombaa ni

²⁹ Alecin fofore na Yohane anu ka Yesu suba i do, na wo se ka, "Am nie, Nyeme bombaa n bo wo ba ka i ba yi durunya n nufom satie n lee. ³⁰ Yiri, ye m yo seeri am ka sono n bo i wo m sin suba na i tara m fieo n lee, dama i yo woori bere wo ka, ye bu wuuri m a, yiri lee. ³¹ Mini mmoo ni m tii yo si ma i, m dee la ka m bie minem Nyeme nzue wo, adena amberere Yisarelifom si i." ³² Na Yohane adi daani ase minem ka, "Ma nu ka Nyeme Awiewie Casi n afite angoro ajura ka tiiwa dee su aba atana i nu, na wo wo i do. ³³ Mini mmoo ni m tii yo si ma i, ama, Nyeme bo i sunmaari m ka m

ba biε mine Nyeme nzue ni, yiri seeri m ka, ‘A bá ηu ka m Awiewie ni júra ba tana sono be ηu, na i wó i do, yiri má m Awiewie Casi n ba wura minem ηu a.’ ³⁴ Ma ηu i so ye m sudi daani kere mine a, ka yiri ti Nyeme Wa n nahore su a.”

Mine n bo bu du mo yoori Yesu susufom ni

³⁵ Na alecin fofore bekun na Yohane ni i susufom ni nnyo jina. ³⁶ Na wo nie anu ka Yesu wo natiiri su susin, na wo se ka, “Am nie, Nyeme Bombaa n lae.” ³⁷ I susufo nnyom n tiiri so n na ba ko asu Yesu su. ³⁸ Na Yesu akaaki anie anu ka bu susu i su, na wo bisa bu ka, “Am koro nzu wo?” Na ba bisa i ka, “Rabi, a da ni wo?” Rabi bu la ka, ya Kerefó. ³⁹ Na wo se bu ka, “Am bra na am ba nie.” Nyini sangani, naaso kerefi nna abo, na ba su i su, na ba ko anu deke bo i wo ni. Na ba ka i do nyini ceen ni. ⁴⁰ Nyini mine n nnyom n bo bu yo tiiri kabo Yohane seeri n na bu suuri Yesu su ni, bu nu kun ye bu fere i ka Andere n a, bo i goró la Simon Petoro ni. ⁴¹ Nyini sin na Andere ako anu i goró Simon, na wo se i ka, “Ya ηu Mesaya ni.” Mesaya bu la ka Kristo, Tiidefo n bo Nyeme ase ka i sunma i ni. ⁴² Na wo fa i aba Yesu do. Na Yesu anie i nyunu, na wo se i ka, “Bu fere u ka Simon wo, woro ti Yohane wa n a, ama, bu ba fere u ka Kefasi.” I bu la ka yabuε, i ni Petoro kere ti duma kun wo.

Kabo Yesu fereeri Filipu ni Natanieli ka bu su i su ni

⁴³ Alecin fofore na Yesu ayasu ka i ko Galili deε awore n nu. Na wo ko anu sono be bo bu fere i ka Filipu ni, na wo se i ka, “Ba su m su.” ⁴⁴ Filipu

bosu la miε be bo bu fere i ka Besayida n wɔ. I ni Andere ni Petoro kεre fite miε kun su wɔ. ⁴⁵ Na Filipu gusu akɔ anɔ sɔnɔ be bo bu fere i ka Natanieli, na wɔ se i ka, “Ya nɔ sɔnɔ n bo Moyisi yo kεreri i jɔre Nyeme nɔanie kpamaawa kadasi n nu ni, na Nyeme nɔanie kanfɔm gusu yo kεreri i jɔre bu dεε kadasi n nu ni. Yiri la Yesu n bo i fite Nazareti ni, na i si la sɔnɔ be bo bu fere i ka Yosefu ni.” ⁴⁶ Na Natanieli abisa i ka, “Deke kpa koro fite Nazareti dεε miε n gusu nu?” Na Filipu ase i ka, “Bra na a ba niε.” ⁴⁷ Nyini sanɔa na Yesu anɔ ka Natanieli suba i dɔ, na wɔ se ka, “Ahin sɔnɔ n ti Yisarelifɔ baa a nahɔre su, bo sa be wo má i nɔ.” ⁴⁸ Na Natanieli abisa i ka, “A yo se siiri m a?” Na Yesu abɔ i nu ka, “M nɔuri u sanɔa bo a toko tana damba baka n bu n wɔ, nyini sin ye Filipu fereeri u n a.” ⁴⁹ Na Natanieli ase i ka, “Ya Kerefɔ, wɔrɔ ti Nyeme Wa n a, nahɔre su. Wɔrɔ ti Yisarelifɔm Feme n a.” ⁵⁰ Na Yesu ase i ka, “Bo ma se u ka m nɔuri u damba baka n bu n ti ye a yo m yarada, nzen se? A bá nɔ alekutura sam bo bu tara sɔ. ⁵¹ Nahɔre ye m suse am a. Am bá nɔ kabo anɔgoro bá teke na Nyeme merεkem bá sfun kɔ anɔgoro, na bu bá sujura ba mini Adamande Wa n dɔ.”

2

Kabo Yesu kɔri konyaya be Kana miε kpiri n nu ni

¹ Nyini sin, i lesan cεen na konyaya be awo Kana, miε kpiri n bo i wo Galili awɔre n nu ni. Na Yesu ni gusu akɔ konyaya n nu. ² Na ba fere Yesu ni i susufɔm n ka bu gusu ba di konyaya n be.

³ Saɗga bo konyayafom nzan n ba kpiɛeri bu su ni, na Yesu ni aba ase i ka, “Bu nzan n awie.”

⁴ Na Yesu abo i nu ka, “M ni, ye a ɗa m yo se wo? M saɗga nya ju má.” ⁵ Na i ni ase awurunbaam n ka, “Am yo deke kere bo i se am.”

⁶ Nyini dika n nu, yabue cunɗu nsen jina bere, bo i kun kun kere koro de nzue gaɗga nnu wara nsen. Yudafom la bu yoowa be, bu fa nyini cunɗum n nu nzue ni, ye bu bita ɗmisi bu fin a.

⁷ Na Yesu ase awurunbaam n ka, “Am sa nzue go cunɗum n nu na bu yi.” Na ba go i kere nzue na ba yi. ⁸ Na Yesu akaaki ase bu ka, “Kisa am sa be ko ma konyafan danfo ni.” Na ba sa be ako ama i. ⁹ Bu sa ko maari i ni, na nzue n akaaki nzan. Na wo fa akan i noo. Wo si ma deke bo nyini nzan n fite. Ama, awurunbaam bo bu saari nzue ni, bere si deke bo i fite. Na wo fere konyafan ni, ¹⁰ ase i ka, “Sono kere nya ɗa bu ma nzan, bu du mo fa nzan fiɛfiɛ n ma jama n a ka, na ba nya aba anu abo ni, na bu nya fa bo i yo ma fiɛ n ma bu, ama, woro, a fa bo i yo fiɛ n aka sin a.” ¹¹ Kabo Yesu maari nzue kaaki nzan ni, nyini tiiri i ciciri su deɛ alekutura sa. I yoori nyini sa n Kana, bo i wo Galili awore n nu n wo, na i kere kabo i la yiko n bo i fite Nyeme do, na i susufom n ayo i yarada.

¹² Nyini sin, na i ni i ni, ni i niemam, ni i susufom n ako mie kpiri n bo bu fere i ka Kapenam, na ba ko ayo lennyo do.

Kabo Yesu fɔnri watafom fiteeri Nyeme Sereebiri Awuru n nu ni

¹³ Wo ka kaan na Yudafom di bu ceenkpiri n bo bu fere i ka Butara ceenkpiri ni. Na Yesu ako

Yerusalem miε kpiri n nu. ¹⁴ Na wɔ kɔ awura Nyεmε Sereebiri Awuru n nu aɲu ka mine wo dɔ suto naanim, ni nbɔem, ni bumbuku tiiwam, na ηwaa kaakifɔm gusu tana dɔ. ¹⁵ Na wɔ fa nyama aɲɔ i ka ηgbere dεε su, na wɔ fa afɔn ayi nbɔem n ni naanim n kεrε afite Nyεmε Sereebiri Awuru n nu. Na wɔ sandi ηwaa kaakifɔm ηwaa n kεrε abutu, na wɔ nya akaaki bu teebirim kεrε alanlanga. ¹⁶ Na wɔ se minεm bo bu tɔ bumbuku tiiwam n ka, “Am fa am bumbukum n fite fεn. Mǎ am se ka am fa m Si Nyεmε Sereebiri Awuru n yo gɔ kun.”

¹⁷ Na i susufɔm n aba atεnge su ka ba kεrε i Nyεmε Jɔrε Kadasi n nu ka, “M Nyεmε Fεmε, m nyunu aboro u awuru n jɔrε su, nyini kún m a.” ¹⁸ Na Yudafo nkpiεnm abisa i ka, “A yó nzu alekutura sa bo i kere ya ka a la atin bo a yo sɔ a?” ¹⁹ Na Yesu ase bu ka, “Am bo fufu ahin Nyεmε Sereebiri Awuru ni, na lesan afiεn m kǎaki ta i bekun.” ²⁰ Na ba se i ka, “Afo aburana ni nsen ye bu fa taari ahin Nyεmε Sereebiri Awuru n a. I yo sε ye wɔrɔ ba se ka a kǎaki ta i lesan afiεn a?” ²¹ I yo kaanri sɔ ni, i faari i ηuniεmbaa ni fa sunsun Nyεmε Sereebiri Awuru n a. ²² Na saɲga bo i ba wu tengeeri i yiwee n nu ni, na i susufɔm n atεnge su ka i yo seeri sɔ, na ba de nɔaniε n bo ba kεrε i Nyεmε Jɔrε Kadasi n nu ni, na ba yo Yesu jɔjɔwa n yarada.

Yesu si kabo adamande woowa ti barasu

²³ Saɲga bo i wo Yerusalem na bu sudi Butara cεenkpiri ni, i yoori alekutura sam, na mine dɔɲgu aɲu i, na ba yo i yarada. ²⁴ Ama, yiri afa

má i ñu ago má bu ñu, dama i si kabo adamande woowa ti. ²⁵ Má pui ti, yiri mmɔɔ ni i tii si kabo adamande ahore su ti barasu, má be se i a.

3

Kabo Yesu kaanri Nyeme jɔre kereeri Nikodemo ni

¹⁻² Cɛɛn be kɔŋɔɛ sɔ ɔ, na Yudafɔm kpiɛn be aba Yesu dɔ, bu fere i ka Nikodemo. I ti Farasifɔm ni kun be wɔ. Na wɔ se Yesu ka, “Ya Kerefɔ, ya si ka a ti kerefɔ n bo a fite Nyeme dɔ ɔ, dama be koro yo má alekutura sa bo a yo bu ni, má ka Nyeme wo i mi dɔ.” ³ Na Yesu ase i ka, “Nahɔre ye m suse u a. Sɔnɔ koro fa má Nyeme yo má i femɛ, má ka ba wu i fɔfɔre.” ⁴ Na Nikodemo abisa i ka, “Sɔnɔ nyunu ati, bu yo se koro kaaki wu i fɔfɔre a? I koro kaaki wura i ni kunnu na bu wu i bekun?” ⁵ Na Yesu ase i ka, “Nahɔre ye m suse u a, sɔnɔ koro wura má Nyeme femɛya n nu, má ka ba wu i fɔfɔre fa kɔ nzue biɛɛwa ni Awiewie Casi n dɛɛ atin n su. ⁶ Deke bo adamande awu i, i ti adamande wɔ, na deke bo Awiewie Casi n awu i, i ti awiewie wɔ. ⁷ Má a ma i yo u alekutura fa kɔ kabo ma se u ka wɔ yo daka ka bu wu am fɔfɔre ni. ⁸ Saŋga kere a ti ka aŋuma kpie kɔ ɔ, ye a ti i nanmie ŋga a, ama, a si má deke bo i fite, na a kaaki si má deke bo i suko, nyini ti, sɔnɔ kere bo Awiewie Casi n awu i ti sɔ ɔ.”

⁹ Na Nikodemo abisa Yesu ka, “I yo se ye ahin koro yo a?” ¹⁰ Na Yesu akaaki abisa i ka, “Wɔrɔ bo a kere Yisarelifɔm Nyeme nɔɔnie n na bu nyunu yi u ni, i yo se ye a si má ahin n a?”

¹¹ Nahore ye m suse u a, sa bo ya si i, ye ya jɔɔ i jɔre a, na sa bo ya nyumbaa anu i, ye ya di i daani kere minem a, ama, am akete ya daani diiwa ni. ¹² M suse am sam bo bu wo durunya n nu fen wo lee, ama, am sude ma i, ye m ba seeri am sam bo bu wo Nyeme femeya n nu, am yo se de i a? ¹³ Be nya fun ma Nyeme do, ma ka mini Adamande Wa n bo m woori i do na ma jura aba ni. ¹⁴ Kabo Moyisi yo faari jawii yoori i ka wo dee su n na i fa i bara yeeri baka n na i yeeri i su kpamaari boro kpantain n nu ni, wo yo daka ka so ye minem ba ye mini Adamande Wa n su a. ¹⁵ Na sono kere bo i yoori m yarada, i nya ngoo bo i la ma awieeri ni.”

¹⁶ Nyeme akoro durunya n nufom agaya n dee ti, na wo fa i kunnu Wa kun n kpein n afa ama bu, adena sono kere bo i yo i yarada, i mi ka ma ngbeen, ama, i nya ngoo bo i la ma awieeri ni. ¹⁷ Nyeme asunma ma i Wa n durunya n nu ka i ba di bu jore cin bu sui wo, ama, wo sunma i ka i ba de bu tii ji wo. ¹⁸ Sono kere bo i daafiiri Nyeme Wa n nu, Nyeme di ma i mi n jore, ama, sono kere bo wo da ma i nu, Nyeme adu mo adi i jore ka, dama ka wo da ma Nyeme Wa kun n kpein n nu n dee ti. ¹⁹ Kabo Nyeme di bu jore n la ka, wein n aba durunya n nufom do, ama, bu satie yoowa n dee ti, ba koro awosin n atara wein ni. ²⁰ Sono kere bo i yo satie kpoo wein n wo, i koro ma ka i ko wein n nu, na i satiem fite fofoe nu. ²¹ Ama, sono kere bo i su nahore atin su, i fite fofoe nu wo, na mine kere nu ka i sayoowa n su Nyeme atin n su wo.

Kabo Yohane diiri Yesu ɲu daani barasu ni

²² Nyini sin na Yesu ni i susufɔm n akɔ Yudiya dɛɛ awɔrɛ n nu. Na ba kɔ adi lennyɔ dɔ, na i subie minem Nyemɛ nzue. ²³ Nyini sanɓa n na Yohane gusu subie minem Nyemɛ nzue. I wo Ayinon mie n nu fa dodo Salim awɔrɛ n nu, dama nzue sunnu dɔ n dɛɛ ti. Na minem suba i dɔ na i subie bu Nyemɛ nzue. ²⁴ Nyini sanɓa ni, ba nya anyi má Yohane dansaraka.

²⁵ Na Yohane susufɔm ni Yudafɔ be awura akuruwa fa kɔ bu fin kpara n dɛɛ yoowa atin su. ²⁶ Na ba kɔ Yohane dɔ akɔ ase i ka, “Ya Kerefɔ, nie. Sɔnɔ n bo i yo baari u dɔ Yodan kunma n wie afiiri n na a yo diiri i ɲu daani kereeri mine ni, yiri wo dɔ subie minem Nyemɛ nzue n a, bu kere sukɔ i dɔ ɔ.” ²⁷ Na Yohane ase bu ka, “Sɔnɔ koro nya má deke be, má ka Nyemɛ afa nyini deke n ama i. ²⁸ Ambere ni am tii woori m daani ka m ɲa má mini ti Kristo Tiidefɔ n a, ama, Nyemɛ sunmaari m ka m du i mɔ ɔ. ²⁹ Bu nya jaari konya, i ti konyafan n dɛɛ wɔ, ama, na konyafan n danfo jina suso i sui ti deke bo konyafan ni jɔjɔ se i, nyini sanɓa na i danfo n ahore jɔ. Nyini ahorejɔ kun ni, wo mini gusu dɔ a. ³⁰ Wɔ yo daka ka i dɛɛ duma n fun, na m dɛɛ n kpie su.”

Yiri bo i fite angoro n dɛɛ jɔrɛ

³¹ Yiri bo i fite angoro n tara sɔnɔ kere. Na bo i fite durunya n nu fen ti durunya n nu fen fɔ ɔ, na i jɔjɔwa kere ti durunya n nu fen jɔrɛ wɔ. Ama, yiri n bo i fite angoro n tara sɔnɔ kere. ³² Deke bo wɔ ɲu i, ni bo wɔ ti i, ye i di i daani kere mine a, ama, be de má i daani diiwa ni. ³³ Ama, sɔnɔ kere bo i deer i daani diiwa n asoro su akere ka

Nyeme ti nahorefɔ lee. ³⁴ Dama yiri n bo Nyeme asunma i ni, Nyeme noanie n ye i kan i a, dama Nyeme afa i Awiewie Casi n ama i bo i la má anusu. ³⁵ Nyeme koro i Wa ni, na wɔ fa deke n kere awura i saa nu. ³⁶ Na sɔnɔ kere bo i daari Nyeme Wa n ŋu, i la ŋɔɔ bo i la má awieeri ni. Na sɔnɔ kere bo i kete i noanie ni, i nyá má ŋɔɔ n bo i la má awieeri ni, ama, Nyeme fá yaa cin i sui.

4

Kabo Yesu seeri Samariyafo bara be i tii su jɔre ni

¹⁻² Tɔ. Na Farasifom n ati ka Yesu sunya minem donɔɔ bo bu susu i su na i bie bu Nyeme nzue tara Yohane. Ama, má Yesu ni i tii bie bu Nyeme nzue n a, i susufom ni bie bu a. Sanga bo Yesu faari nu sɔ ni, ³ na wɔ yasu Yudiya awɔre n nu akaaki ka i kɔ Galili dɛɛ awɔre n nu bekun. ⁴ I sukɔ ni, wɔ yo daka ka i fa Samariya dɛɛ awɔre n nu sin a. ⁵ Na wɔ kɔ aju Samariya mie kpiri be bo bu fere i ka Suka n su, na i wo dodo asien n bo Jakobu yo fa maari i wa Yosefu dawa sanga ni. ⁶ Jakobu bura n wo nyini dika n nu wɔ. Natiiri fie n dɛɛ ti, na Yesu akɔ atana bura n su. Nyini sanga wie abi kenken.

⁷ Na Samariya bara be aba ka i ba sa nzue, na Yesu ase i ka, “Ma m nzue n be na m nu.” ⁸ Nyini sanga ni, i susufom n akɔ mie kunnu ka bu kɔ to diire. ⁹ Na bara n ase i ka, “Ee, wɔrɔ, a ti Yudafɔ e, ye m gusu ti m Samariyafo bara. Nzu ti ye a se m ka m ma u nzue a?” Dama Yudafom ni Samariyafo m tɔ má pui. ¹⁰ Na Yesu ase i ka,

“Nzen má a si Nyeme aceeri ni, na má a si sono n bo i susere u nzue ni, má wɔɔ sere i a, na i má u nzue bo i ma ηgɔɔ ni.” ¹¹ Na bara n ase i ka, “Ya si, bura n wo ηgo, u gusu la má goroka, ye a nya nyini nzue n bo i ma ηgɔɔ n ni wɔ? ¹² Wɔɔ, ηka a ηa a tara ya na Jakɔbu n wɔ, nzen se? Yiri maari ya nyini bura n a. I ni i nbaam fa sanɔa ni i nengendɔrem kere yo nuuri nyini bura n nu wɔ.” ¹³ Na Yesu ase i ka, “Sono kere bo i nu ahin nzue ni, nzuehɔe tí i mi bekun, ¹⁴ ama, sono kere bo i nu nzue n bo m má i ni, nzuehɔe tí má i mi kun fieo, dama nzue n bo m má i ni, wó i kunnu tie kabo bura nzue tie n wɔ, na i má i ηgɔɔ bo i la má awieeri ni.” ¹⁵ Na bara n ase i ka, “Ya si, ma m nyini nzue n be na m nu, adena má nzuehɔe ti m kun, na má m kaaki ba sa nzue fen kun.”

¹⁶ Na Yesu ase i ka, “Kɔ fere u hun na am bra.”

¹⁷ Na bara n ase Yesu ka, “M la má hun.” Na Yesu ase i ka, “Kabo a ηa a la má hun ni, i ti nahɔre wɔ.

¹⁸ Dama nbiesom nnu ye a fite bu ajaa bu n a, na haari bo u ni yiri wo bere kisa mmɔɔ ni, i ti má u hun. A se nahɔre wɔ.” ¹⁹ Na bara n ase i ka, “Ya si, ma ηu ka a ti Nyeme nɔanie kanfɔ ɔ.

²⁰ Ya na Samariyafom yo suuri Nyeme ahin buka n su wɔ. Ama, ambere Yudafom ηa wɔ yo daka ka sono kere su Nyeme Yerusalem mie kpiri n nu wɔ.” ²¹ Na Yesu ase i ka, “Bara, de bo m suse u ni, sanɔa suba bo am sú má ya Si Nyeme ahin buka n su, wara Yerusalem mie n nu. ²² Ambere Samariyafom ηa am su Nyeme wɔ, ama, am si má i. Ama, yere Yudafom si i, ye ya su i a. Dama tiide n fite Yudafom dɔ ɔ. ²³ Sanɔa suba bo wɔ ju awie, na bo bu su ya Si Nyeme ni, i Awiewie

Casi ni búka bu ye bu sú i ni nahore su a. Dama nyini minem nusu ye ya Si Nyeme koro ka bu su i a. ²⁴ Nyeme ti awiewie wo, nyini dee ti, bo bu su i ni, wo yo daka ka i Awiewie Casi n búka bu na bu sú i ni nahore su.” ²⁵ Na bara n ase i ka, “To, m si ka Kristo Tiidefo ni bá. I ba juuri, i kán ya deke kere kere ya.” ²⁶ Na Yesu ase i ka, “Mini bo m sujɔɔ u do ni, mini lee.”

²⁷ Nyini sangá n nu na Yesu susufom n afite mie n kunnu aju, na jore n amie bu kabo Yesu ni bara n wo jɔɔ su ni. Ama, bu be abisa má bara n ka, “A koro nzu i do a?” Be gusu abisa má Yesu ka, “Nzu ti ye a sujɔɔ bara n do a?”

²⁸ Na bara n ayaki i dundu n bere, na wo kpie i nyi ako mie n kunnu ako ase minem ka, ²⁹ “Am ba nie sɔɔ be bo wo se m m tii su sa kere bo ma yo i. Beni, kisa, Kristo Tiidefo n lee fan?” ³⁰ Na minem n afite mie n nu, na bu ko Yesu do.

³¹ Bara n kɔori n dee sin, na Yesu susufom n asere i ka, “Jande, ya Kerefo, di diire.” ³² Na wo se bu ka, “M la diire bo m di bo am si má i.” ³³ Na i susufom n abisa bu nɔnɔ nu ka, “Be afa diire aba ama i wo di wo, nzen se?” ³⁴ Na wo se bu ka, “M diire n la ka, m yo yiri bo wo sunma m dee koroowa na m yó i juma n wie.” ³⁵ Na wo bo bu anyunderere ase ka, “Am na wo ka sara nna na am tambu fiesu nengem. Ama, mini suse am wo lee, am tu am tii na am nie, fiesu diire n abi ni kpie. ³⁶ Sɔɔ bo i kpie diire ni, i nya i nkato, i ti ka sɔɔ bo i tien mine nɔɔ, na bu nya ngɔɔ bo i la má awieeri ni, dofo ni kpiefo n kere nya ahorejo. ³⁷ Be bu na ‘Be do, na be kpie ni,’ i ti nahore wo. ³⁸ Ambere yiri, mini asunma am a,

ka am kɔ kpɛ diire n bo am adɔ má i ni. I ti ka nbem adu mɔ akan Nyɛmɛ nɔaniɛ n akere minɛm, ye am dɛɛ la ka am ma bu yo m yarada. Nbem dɛɛ jumayoowa ye am sudi i kperɛ n a.”

³⁹ Bara n seeri minɛm bo bu fite miɛ n nu n kabo Yesu ase i tii su sa kɛrɛ n dɛɛ ti, na Samariyafoɔm dɔŋgu bo bu fite miɛ n nu n ada Yesu ŋu. ⁴⁰ Nyini ti, bu ba juuri Yesu dɔ ni, na ba sere i ka i ka bu dɔ, na wɔ kɔ awo bu dɔ cɛɛn nnyɔ. ⁴¹ Na minɛ dɔŋgu ada i ŋu abuka su fa kɔ i nɔaniɛ jɔjɔowa n ti. ⁴² Na ba se bara n ka, “Kisa, má u dɛɛ jɔjɔowa n ŋgumi ti ye ya da i ŋu a, ama, yere mmɔɔ ni ya tii ati i nɔaniɛ jɔjɔowa, na ya si nu ka ahin sɔnɔ n ti bo i baari ka i ba de durunya n nufɔm tii wɔ, nahɔrɛ su.”

Kabo Yesu maari femɛ n kpɛn be wa nyaari laifɛ ni

⁴³ Yesu woori bu dɔ cɛɛn nnyɔ n sin, na wɔ yasu bɛrɛ akɔ Galili dɛɛ awɔrɛ n nu. ⁴⁴ Dama yiri mmɔɔ ni i tii adu mɔ akan ka Nyɛmɛ nɔaniɛ kanfɔ la má jirima i tienɔgu bɔsu. ⁴⁵ Saŋga bo i kɔ juuri Galili ni, na ba de i ni bu sa nnyɔ, dama bu yo ŋuuri kabo i yoori alekutura sam cɛɛnkpiri n saŋga, Yerusalem miɛ kpiri n nu ni, dama bɛrɛ mmɔɔ yo kɔori nyini cɛɛnkpiri n di ti.

⁴⁶ Na Yesu akaaki akɔ Kana, miɛ kpiri n bo i wo Galili awɔrɛ n nu ni, deke bo i yo maari nzue kaakiiri nzan ni. Femɛ n kpɛn be woori dɔ. I wa be la má laifɛ, i wo Kapɛnam miɛ kpiri n nu. ⁴⁷ Na saŋga bo kpɛn n tiiri ka Yesu afite Yudiya dɛɛ awɔrɛ n nu akɔ aju Galili ni, na wɔ kɔ Yesu dɔ akɔ asere i ka i wa suwu, i ma bu kɔ na i kɔ

tuntun i, na i nya laifiε. ⁴⁸ Na Yesu ase i ka, “Ma ηu ka nzen am anu má alekutura sam, am yo má m yarada.” ⁴⁹ Na kpien n ase i ka, “M Mibiε, bra ndende, má nyini, a cεeri, a bá ηu ka m wa n awu.” ⁵⁰ Na Yesu ase i ka, “Kɔ. U wa n anya laifiε.” Na wɔ de Yesu nɔaniε ni, na wɔ kaaki ako. ⁵¹ Na sanɔa bo i sukɔ awuru ni, na i akɔɔm akpa i atin aba ase i ka, “U wa n anya laifiε.” ⁵² Na wɔ bisa bu ka, “Sanɔa bɔnɔ ye i ηuniε n jɔɔri a?” Na ba se i ka, “Anuma wiesu kerefi kun sanɔa ye i ηuniε n jɔɔri a.” ⁵³ Dɔ na baa n si n atenje su ka, nyini sanɔa n nu lεε, ye Yesu seeri i ka i wa n anya laifiε n a. Na i ni i dikafɔm kere ada Yesu ηu. ⁵⁴ Kabo Yesu ma baa n nyaari laifiε ni, nyini tiiri i alekutura sa nnyɔ su bo i yoori sanɔa bo i fite Yudiya dεε awɔre n nu kɔɔri Galili n a, na i kere kabɔ i la yiko n bo i fite Nyeme dɔ.

5

Kabo Yesu tuntuunri sɔnɔ be kunma n nɔɔ su ni

¹ Nyini sin na Yesu akɔ Yerusalem miε kpiri n nu na i kɔ di Yudafɔm cεenkpiri be. ² Kunma be da dodoori anɔ n bo bu fa nbɔem fa sin wura miε n nu ni. Hiburu aniε nu bu fere nyini kunma n ka Besata, i la kpatam nnu wɔ. ³ Landurifɔm beberebe dada kpatam n nu, bu nu nbem ti anyinsinm, nbem ti kujandafɔm, na bu nbem gusu ηuniε buekun awu bo bu koro yasu má. [⁴ Bu da ηmindɔ dɔ, dama sanɔa sanɔa Nyeme mereke jura ba kunma n nu wɔ, na i ba kankan nzue n nu. Nzue kankanwa n dεε sin, na landurifɔ n bo i du mɔ juraari nzue n nu, i

tukpaki n koro i ti ka se, i yaki wo, na i nya laifie.]
⁵ Sono be woori bu nu bo wo da tukpaki i afo aburasan ni mocue lee. ⁶ Yesu nuuri i so ni, na wo fa nu ka sono n tukpaki n ace i nu, na wo bisa i ka, "A koro ka a nya laifie wo?" ⁷ Na tukpakifo n ase Yesu ka, "M Mibie, m la ma bukafu be bo nzue n nya ba kankan, na i kuku m wura nu. Sanga kere bo nzue n nya ba kankan, na m ba na m wura nu, a nu ka be adu m mo." ⁸ Na Yesu ase i ka, "Yasu, fa u dasu n na a nati." ⁹ Jinaabiri n nu bere na sono n anya laifie, na wo yasu afa i dasu n sunati.

Nyini ceen n bo Yesu tuntuunri sono n ti Numiyi ceen wo. ¹⁰ Nyini ti na Yudafo m nkpienkpienm n ase sono n bo wo nya laifie n ka, "Nyuma ti Numiyi ceen wo. Ya dee atin n su, atin wo ma nu bo a so u dasu ni." ¹¹ Na wo se bu ka, "Sono n bo i tuntuunri m ni, yiri seeri m ka m fa m dasu na m nati a." ¹² Na ba bisa i ka, "Nyini sono n la nma a, ye i seeri u ka a fa u dasu nati a?" ¹³ Ama, na sono n bo wo nya laifie n akoro asi ma i mi n bo i tuntuunri i ni, dama Yesu awura jama n nu ako. ¹⁴ Nyini sin na Yesu aba anu i, Nyeme Sereebiri Awuru n nu, na wo se i ka, "Ti fen. Kisa a nya laifie, ma a yo satie kun. Ma nyini, a di wahara bo i tara nyini n nusu." ¹⁵ Na sono n ako ase Yudafo nkpienkpienm ni ka Yesu tuntuunri i a. ¹⁶ Nyini ti, na ba kere Yesu wuwuruwa, dama wo tuntun sono Numiyi ceen n dee ti. ¹⁷ Na wo se bu ka, "M Si toko yo juma haari ba ju ni nyuma, nyini ti ye m gusu yo a." ¹⁸ Yesu jooori so n dee ti, na Yudafo m nkpienkpienm n aboro bu nyi abuka su ka bu

kun i. Má ka bo wɔ saaki Njumiyi cɛɛn n ciire n ngumi dɛɛ ti, ye bu kpi ka bu kun i a, ama, bo wɔ kaaki ase ka Nyɛmɛ ti i Si n dɛɛ ti. Nyini kere ka wɔ fa i nju abu Nyɛmɛ wɔ lɛɛ.

Kabo Yesu yiko ti barasu ni

¹⁹ Na Yesu ase bu ka, “Nahɔɛ ye m suse am a, mini Nyɛmɛ Wa n ni m tii, m koro bo má m tiɛnu yo má pui, má ka deke bo m nju ka m Si yo i ni, ye mini gusu yo i a. ²⁰ Dama m Si Nyɛmɛ koro mini i Wa ni, na i sukere m deke kɛɛ bo i yo i ni, na i bá kere m sakpakpam bo m yó bu tara sɔ, na i yó am alekutura. ²¹ Kabo m Si Nyɛmɛ ye minɛm bo ba wu n su n na i ma bu ngɔɔ ni, sɔ ye mini gusu ma minɛm bo ma yi bu ni ngɔɔ a. ²² Dama m Si Nyɛmɛ ni i tii di má be jɔɛ, ama, wɔ fa jɔɛdi atin kɛɛ ama mini i Wa n wɔ, ²³ adena sɔnɔ kɛɛ bu m kabo bu bu m Si ni. Sɔnɔ kɛɛ bo i bu má m, i mi abu má m Si bo wɔ sunma m n lɛɛ.

²⁴ Nahɔɛ ye m suse am a, sɔnɔ kɛɛ bo i ti m nɔaniɛ n na i de i, na i da Nyɛmɛ bo wɔ sunma m n nju, i mi la ngɔɔ bo i la má awieeri, na m dí má i mi jɔɛ. I mi afite yiwee nu anya ngɔɔ lɛɛ. ²⁵ Nahɔɛ ye m kaaki suse am a, ka sanɔga suba bo wɔ ju awie, na minɛ bo ba wu ni tí mini Nyɛmɛ Wa n nɔaniɛ ni, na bo bu tiiri i na bu deerii, bu nyá ngɔɔ. ²⁶ Dama kabo ngɔɔ fite yiri m Si Nyɛmɛ dɔ ni, sɔ ye wɔ ma mini i Wa n gusu yiko ka m ma minɛm ngɔɔ a, ²⁷ na wɔ kaaki ama m atin ka m di minɛ jɔɛ, dama m ti Adamande Wa a. ²⁸ Má am ma ahin jɔjɔwam n yo am alekutura. Sanɔga suba bo minɛ bo ba wu

n kere tí m nɔanie ni, ²⁹ na bu ténge bu yiwee n nu. Minem bo bu yo yoori sakpa ni, bu ténge na bu nya ngɔɔ bo i la má awieeri, na minem bo bu gusu yo yoori satie ni, bu ténge na bu nya suicin.”

Sam bo bu di Yesu ɲu daani ni

³⁰ Na Yesu asa su ase ka, “M koro bo má m tiɛnu yo má pui. Kabo Nyeme se m ni, so ye m di minem jɔre a. Nyini ti, m jɔre diiwa n ti nahɔre wɔ, dama m yo má m dɛɛ koroowa, ama, m yo yiri n bo wɔ sunma m n dɛɛ koroowa a.

³¹ Nzen m di m ɲu daani kere am, am de má ka i ti nahɔre, ³² ama, be wo bere bo i di m ɲu daani. Yiri la m Si Nyeme. Na m si ka i daani diiwa n ti nahɔre wɔ. ³³ Am yo sunmaari minem Yohane dɔ, na wɔ se am nahɔre, kabo m ti barasu. ³⁴ M de má adamande daani diiwa, ama, m kan kabo Yohane seeri am ni, adena am nya am tii. ³⁵ Yohane yo ti ka fitana bo i je na i ta a, na amberɛ ayo asoro su ka am wo i wein nu ni ahorejɔ fa kɔ sanɣa su. ³⁶ Ama, m la deke bo i di m ɲu daani bo i tara Yohane dɛɛ ni, yiri la sam bo m Si Nyeme akere m ka m yo bu wie ni. Nyini sam ni di m ɲu daani ka m Si asunma m a. ³⁷ Na m Si bo wɔ sunma m ni, yiri gusu adi m ɲu daani a. Am nya ti má i konvi, am kaaki nya ɲu má i kabo i ti barasu, ³⁸ na i nɔanie wo má am ahore su, dama wɔ sunma m am dɔ, na am ada má m ɲu. ³⁹ Am kan Nyeme Jɔre Kadasi n wɔ, na am fiiti i nu, dama am sunsun ka nyini kere am atin bo am fa na am nya ngɔɔ bo i la má awieeri a, ama, nyini kereɛwam nu di m ɲu

daani a. ⁴⁰ Haari ni nyini n mmɔɔ am akete ka am ba má m dɔ na am ba nya ɲɔɔ.

⁴¹ M koro má kansi adamande dɔ. ⁴² M si am sa, na m si ka, Nyeme dɛɛ koro n wo má am ahore su. ⁴³ Mini ade m Si jinaabiri aba, ye am ade má m, ama, nzen be baari ni i tienɲu ba, am dé yiri wɔ. ⁴⁴ Ambeɛ, am koro am ɲuɲu nu kansi wɔ, na bu susu am, ama, am koro má kansi yiri n ɲgumi bo i ti Nyeme n dɔ, nyini ti, i yo sɛ ye am koro da m ɲu a? ⁴⁵ Má am sunsun ka mini kó jarakɪ am m Si Nyeme dɔ a. Am jarakifo la Moyisi, bo am la tama ka yiri búka am ni. ⁴⁶ Moyisi yo kereeri m ɲusu jɔɛ wɔ. Nyini ti, nzen má am de i nɔaniɛ ni, má am de m gusu dɛɛ ni. ⁴⁷ Ama, am ade má kabo i yo kereeri i ni, i yó sɛ ye am koro de bo m suse am n a?"

6

Kabo Yesu maari nbiɛsɔm akpii nnu ni bu minɛm diire ni

¹ Nyini sin, na Yesu akpiɛ akɔ Galili kunma kpiri n bo bu kaaki fere i ka Tiberiya n buekun dɔ. ²⁻⁴ Nyini saɲga, wɔ ka kaan, na Yudafoɔm di bu Butara cɛɛnkpiri ni. Na jama beberebe asu i su, dama ba ɲu kabo wɔ yo alekutura sam atuntun tukpakifoɔm na ba nya laifie ni. Na Yesu ni i susufɔm n afun akɔ atana buka be su. ⁵ Na Yesu atu i tii anie anu ka jama beberebe suba i dɔ, na wɔ bisa Filipu ka, "Ya nya diire nifansu wɔ, na ya to ma ahin minɛm kere a?" ⁶ Yiri mmɔɔ ni i tii si kabo i yó barasu, ama, i subo Filipu kunnu na i nie wɔ. ⁷ Na Filipu ase i ka, "Haari nzen ya faari ɲwaa beberebe toori diire maari bu, i jú má bo

bu kere koro nya kan kan di.” ⁸ Na i susufom kun bo bu fere i ka Andere, na i goro la Simon Peto n ase Yesu ka, ⁹ “Gbefene kaan be wo ya nu fen, i bita kpono nnu ni jombaa nnyo, ama, i koro ju ma ahin minem kere.” ¹⁰ Wura mone sunnu bere, na Yesu ase i susufom ka, “Am ma minem kere tantana wura n su.” Na ba ma minem kere atantana. Nbiesom ngumi ko yasuuri mine akpii nnu wo. ¹¹ Na Yesu afa kpono n na wo da Nyeme asi, na wo kpakpaaki i nu ama minem bo bu tantana ni, na wo kaaki afa jombaa n ayo i so, na bu kere anya kabo bu koro. ¹² Bu kere diiri na bu kunnu yiiri ni, na wo se i susufom n ka, “Am tientien sinsin n bo ba di i na wo ka n noo. Ma am ma be ka ngbeen.” ¹³ Na ba tientien kpono sinsin n bo ba di i na wo ka n noo, na wo yi kandie buru ni nnyo. ¹⁴ Minem n juuri nyini alekutura sa n bo Yesu yoori ni, na ba se ka, “Nahore, ahin sono n ti Nyeme noanie kanfo n bo bu seeri ka i ba durunya n nu n a.” ¹⁵ Yesu faari nu ka bu koro ka bu tara i fanga, na bu fa i yo bu feme n dee ti, na wo yasu afite bu nu yiri ngumi, ako buka n su.

Kabo Yesu natiiri nzue su ni

¹⁶ I naaso sanga, na Yesu susufom n ajura ako kunma kpiri n nu, ¹⁷ na ba ko awura lee nu ka bu kaaki kpie ko Kapenam mie kpiri n nu. Ale aban kere, na Yesu nya ba ma bu do, ¹⁸ na anjuma sukpie fanga su, na nzue nyama gusu suyasu. ¹⁹ Nyini sanga ni, i susufom n wo nzue n su ako aju kunma kpiri n afien, na ba nu Yesu ka i nati nzue n su suba dodo lee ni, na sere ati bu. ²⁰ Na Yesu ase bu ka, “Mini a, ma am ma sere ti am.”

21 Na ba ma wɔ wura lee n nu. Jinaabiri n nu bere, na ba ju deke bo bu sukɔ ni.

Kabo jama n sunienie Yesu busu ni

22 Alecin na jama n bo bu kaari kunma kpiri n buekun dɔ n afa nu ka lee kun n kpein woori kunma n su anuma n a. Na ba si nu ka Yesu susufɔm n ngumi wuraari lee n nu kɔɔri a, ama, yiri mmɔɔ ni i tii awura má nu. 23 Na lee nbem afite mie n bo bu fere i ka Tiberiya n aba aju kunma n nɔɔ su, fa dodo deke bo Yesu sereeri Nyeme gɔɔri kpɔnɔ n su maari minem na bu diiri ni. 24 Na jama n anie, ba ŋu má Yesu ni i susufɔm n bere, nyini ti, na ba wura leem n nu ako Kapenam kɔ sunienie Yesu busu.

Kabo Yesu ŋa yiri ti diire n bo i ma ngɔɔ n a

25 Minem n kɔ ŋuuri Yesu kunma kpiri n buekun dɔ ni, na ba bisa i ka, “Ya Kerefo, sanɔga bɔnɔ ye a baari fen a?” 26 Na wɔ se bu ka, “Nahɔre ye m suse am n a, má alekutura sam bo m yoori bu n ti ye am sunienie m busu a, ama, kabo m maari am diire na am kunnu ayi n dɛɛ ti a. 27 Má am ma am nyunu boro diire bo i saaki n busu, ama, am ma am nyunu boro diire bo i wie má, na i ma ngɔɔ bo i la má awieeri n busu. Mini Adamande Wa ni má am nyini diire n a, dama mini ngumi, ye m Si Nyeme ase m nyaari akere ka m ti i dɛɛ a.” 28 Na ba bisa i ka, “Ya yo se koro yo juma n bo Nyeme koro ka ya yo i n a?” 29 Na Yesu abɔ bu nu ka, “Juma n bo Nyeme koro ka am yo i n la ka, am yo mini bo wɔ sunma m yarada.” 30 Na ba bisa i ka, “Ye a yɔ nzu alekutura sa kere ya, na ya ŋu i na ya yo

u yarada? A yó sa bɔnɔ ɔ? ³¹ Dama sanɔa bo ya nam yo woori boro kpantain nu ni, bu diiri diire be bo bu fere i ka *mana* n wɔ. Kɔbo ba kɛrɛ i Nyɛmɛ Jɔrɛ Kadasi n nu lɛɛ, ka yiri maari bu diire n bo i fite angoro ye bu diiri a.” ³² Na Yesu ase bu ka, “Nahɔrɛ ye m suse am n a, má Moyisi yo maari nyini diire n bo i fite angoro n a, ama, m Si Nyɛmɛ maari am diire n bo i fite angoro nahɔrɛ su a. ³³ Dama diire n bo Nyɛmɛ ma n la bo i fite angoro, na i ba ma durunya n nufɔm ŋɔɔ ni.” ³⁴ Na ba se i ka, “Ya Mibiɛ, ŋka a ma ya nyini diire n sanɔa kɛrɛ.”

³⁵ Na Yesu ase bu ka, “Mini ti diire n bo i ma ŋɔɔ n a. Sɔnɔ kɛrɛ bo i ba m dɔ, ahɔɛ ti má i mi, na sɔnɔ kɛrɛ bo i yo m yarada, nzuehɔɛ ti má i mi kun. ³⁶ Ama, ma se am, haari ni bo am anu m n kɛrɛ, am suyo má m yarada. ³⁷ Sɔnɔ kɛrɛ bo m Si fa i maari m, i bá m dɔ, na wɔrɔ kɛrɛ bo a ba m dɔ, m kéte má u fieo. ³⁸ Dama ma fite má angoro aba má ka m ba yo m dɛɛ koroowa, ama, m baari ka m ba yo Nyɛmɛ bo wɔ sunma m dɛɛ koroowa a. ³⁹ Yiri n bo wɔ sunma m dɛɛ koroowa la ka, minɛm kɛrɛ bo wɔ fa ama m ni, má m ma bu be mmɔɔ mini, ama, i koro ka m tɛnɔge bu kɛrɛ jina cɛɛn na bu nya ŋɔɔ. ⁴⁰ Dama m Si koroowa la ka, sɔnɔ kɛrɛ bo i ŋu mini i Wa n na i yo m yarada, i mi nyá ŋɔɔ bo i la má awieeri, na m tɛnɔge i jina cɛɛn.”

⁴¹ I seeri ka yiri ti diire n bo wɔ fite angoro aba n dɛɛ ti, na minɛm ni sunɔnɔti i. ⁴² Na ba se ka, “Má Yosefu wa Yesu n lɛɛ? Ya si i si ni i ni kɛrɛ e. Ye i baari sɛ, ye i ŋa i fiteeri angoro baari a?” ⁴³ Na Yesu ase bu ka, “Má am ŋunɔti

am ḡuḡu nu. ⁴⁴ Be koro ba má m dɔ, má ka m Si Nyeme bo wɔ sunma m ni, acin i mi adodo m, na m tɛḡge i mi jina cɛɛn. ⁴⁵ Kabo Nyeme nɔanie kanfɔm yo kerɛeri lɛɛ, ka, ‘Nyeme kɛre sɔnɔ kɛre nyaari a.’ Na sɔnɔ kɛre bo i ti Nyeme kereewa n na i siiri nu, i mi bá m dɔ. ⁴⁶ Nyini kere má ka be adu mɔ aḡu Nyeme wɔ lɛɛ, má ka mini ḡgumi bo m fite m Si Nyeme dɔ n aḡu i a. ⁴⁷ Nahɔre ye m suse am n a, ka sɔnɔ kɛre bo i yo m yarada, i la ḡɔɔ bo i la má awieeri. ⁴⁸ Mini ti diire n bo i ma ḡɔɔ n a. ⁴⁹ Am nam yo diiri diire n bo bu fere i ka *mana* n boro kpantain nu, ama, na ba wu. ⁵⁰ Ama, ahin diire n ti diire barasu be bo i fite aḡgoro wɔ, na sɔnɔ kɛre bo i diiri i, i wú má. ⁵¹ Mini ti diire n bo wɔ fite aḡgoro aba, na i ma ḡɔɔ n a. Sɔnɔ kɛre bo i di ahin diire ni, i nyá ḡɔɔ bo i la má awieeri. Diire n bo m má n la m ḡuniembaa ni, bo m fá ma durunya n nufɔm, na bu nyá ḡɔɔ ni.”

⁵² Yesu seeri sɔ ni, na yaa ati bu, na bu suse akuruwa bu ḡuḡu nu ka, “Ahin sɔnɔ ni yo sɛ koro fa i ḡunie ma ya na ya di a?” ⁵³ Na Yesu ase bu ka, “Nahɔre ye m suse am n a, má ka am di mini Adamande Wa n ḡuniembaa ni, na am nu m dɛɛ mbunja ni, amɛɛre ni am tii la má ḡɔɔ n bo i la má awieeri ni. ⁵⁴ Sɔnɔ kɛre bo i di m dɛɛ ḡuniembaa ni, na i nu m mbunja ni, i mi la ḡɔɔ n bo i la má awieeri ni, na m tɛḡge i mi jina cɛɛn. ⁵⁵ Dama m dɛɛ ḡuniembaa ni, ti deke bo i ti diire nahɔre su a, na m mbunja n ti deke bo i ti nuuwa nahɔre su a. ⁵⁶ Sɔnɔ kɛre bo i di m dɛɛ ḡuniembaa ni, na i nu m mbunja ni, i mi wo ni mini, na mini gusu wo ni yiri lɛɛ. ⁵⁷ Yiri m Si

bo i ma ngɔɔ ni sunmaari m a, i dɛɛ ti, ye m la ngɔɔ a, sɔ ye sɔnɔ kɛrɛ bo i di m n̄uniɛmbaa ni, mini dɛɛ ti, ye i nyá ngɔɔ a. ⁵⁸ Ahin ni ti diire n bo wɔ fite angoro aba n a, i ti má ka diire n bo am nam yo diiri na i sin na bu wuuri ni. Sɔnɔ kɛrɛ bo i di ahin diire ni, i nyá ngɔɔ n bo i la má awieeri.”

⁵⁹ Yesu kereeri nyini kereewa n kɛrɛ sanga bo i wo Kapenam bu tientienbunɔɔ sɔɔ nu n wɔ.

Kabo Petoro seeri ka Yesu ti sɔnɔ bo i ma ngɔɔ n bo i la má awieeri n a

⁶⁰ Yesu susufɔm dɔnggu tiiri i jɔjɔɔwa n sɔ ni, na ba se ka, “Ahin kereewa n ti kekereke. N̄ma koro de i a?” ⁶¹ Na Yesu afa nu ka bu sununuti fa kɔ i kereewa n su, na wɔ se bu ka, “Ahin jɔjɔɔwa n dɛɛ ti ye am koro ka am kaaki am sin n a? ⁶² Ye nzen má am n̄u ka mini Adamande Wa n sukaaki sufun kɔ angoro, deke bo m fite baari ni, má am se sɛ wɔ lɛɛ? ⁶³ Awiewie Casi ni ma mine ngɔɔ a. Adamande yiko be koro ma má ngɔɔ. Nɔan̄ie n bo ma jɔjɔ akere am ni, yiri ma am nya Awiewie Casi n bo i ma ngɔɔ n a. ⁶⁴ Ama, am be n mmɔɔ ada má m n̄u.” Má pui ti, fite sanga bo Yesu boori i juma n bu ni, ye i si bo bu yo má i yarada n a, ni sɔnɔ n bo i bá tɔ i ni. ⁶⁵ Na wɔ se bu ka, “Nyini dɛɛ ti ye ma se am ka be wo má berɛ bo i koro ba m dɔ, má ka m Si ama atin ka i mi yo m susufɔ.”

⁶⁶ I seeri sɔ n sin, na i susufɔm dɔnggu akaaki ayaki i ka bu su má i su kun. ⁶⁷ Na wɔ bisa i susufɔ buru ni nnyɔm ni ka, “Amberɛ gusu koro ka am kaaki yaki m wɔ fan?” ⁶⁸ Na Simon Petoro

abɔ i nu ka, “M Mibie, ya kó nma dɔ a? Wɔrɔ ti sɔnɔ n bo i la noanie n bo i ma nɔɔ n bo i la má awieeri n a. ⁶⁹ Ye ya yo u yarada, na ya si ka wɔrɔ ti sɔnɔ casi n bo a fite Nyeme dɔ n a.” ⁷⁰ Na Yesu abɔ nu ka, “M n̄a am buru ni nnyɔ ye m yiiri am e, má sɔ? Ama, am nu kun ti Sitana sɔnɔ ɔ.” ⁷¹ I jɔjɔ niiri Yudasi wɔ, Simon Isikariyoti wa ni. Yiri Yudasi tiiri buru ni nnyɔm ni kun wɔ, ama, yiri bá tɔ Yesu n a.

7

Kabo Yesu ni i niemam boori anzama barasu ni

¹ Nyini sin na Yesu afa Galili awɔre n nu subara ye, wɔ koro má ka i kɔ Yudiya deɛ awɔre n nu, dama Yudafɔm nkpienkpienm koro ka bu kun i wɔ. ² Nyini san̄ga, wɔ ka kaan na Yudafɔm di bu cɛenkpiri be bo bu fere i ka Nambue Bo cɛenkpiri ni. ³ Na Yesu niemam ase i ka, “Fite ahin awɔre n nu na a kɔ Yudiya, adena u susufɔm gusu kó n̄u sam bo a yo bu ni. ⁴ Dama sɔnɔ kere bo i koro ka mine si kabo i ti barasu, i fa má i sayoowa fie má minem sin, nzen a yo alekutura sam wɔ, ma durunya n nufɔm kere si u sa.” ⁵ I niemam n mmɔɔ ayo má i yarada, nyini ti ye bu seeri sɔ n a. ⁶ Na Yesu ase bu ka, “M san̄ga nya ju má, ama, ambere yiri, san̄ga kere bo am koro, am kɔ ɔ. ⁷ Ambere ye durunya n nufɔm koro kpɔ má am a, ama, bu kpɔ mini wɔ, dama m se bu wɔ, ka bu sayoowam ti má kpa. ⁸ Am kɔ cɛenkpiri n di, m kó má, dama m san̄ga nya ju má.” ⁹ I seeri bu sɔ ni, na wɔ ka Galili dɔ lee nnyɔ.

Kabo Yesu kɔ diiri Nambue Bo cɛɛnkpiri ni

¹⁰ I niemam kɔɔri ka bu kɔ di cɛɛnkpiri ni, na Yesu gusu aba asa bu su, ama, wɔ yi má i ɲu fofoe nu, i fiɛ kɔɔri a. ¹¹ Na Yudafoɔm nkpienkpiɛnm ni suniɛniɛ i, na ba bisa ka, “Ye i wo ni wɔ?” ¹² Na jama n sutu asuturi bu beɲgu dɔ i busu. Nbem ɲa, “I ti sɔnɔ kpa a.” Ye nbem gusu ɲa, “Ai, i dadaka minɛm wɔ.” ¹³ Ama, be akoro akan má i jɔɛ fofoe nu, dama bu kɛɛ soro Yudafoɔm nkpienkpiɛnm n wɔ.

¹⁴ Saɲga bo ba di cɛɛnkpiri n akɔ aju afiɛn ni, na Yesu akɔ awura Nyɛmɛ Sereebiri Awuru n nu, sukere minɛm. ¹⁵ Na Yudafoɔm nkpienkpiɛnm n ayo alekutura, na ba bisa ka, “I yo sɛ ye ahin sɔnɔ n la nyini si n ɲusu sɔ a, bo be akere má i a?” ¹⁶ Na Yesu ase bu ka, “Deke bo m fa kere am ni, i ti má m tiɛɲgu kereewa, ama, m Si Nyɛmɛ bo wɔ sunma m ni, yiri kere m kabo m kere a. ¹⁷ Sɔnɔ kɛɛ bo i ɲa i yó Nyɛmɛ koroowa ni, ye i sí kabo m kereewa n ti a, nzen m kereewa n fite Nyɛmɛ dɔ, wara m tiɛɲgu kereewa. ¹⁸ Sɔnɔ kɛɛ bo i jɔjɔ i koroyanu, i mi koro ka bu kansi i wɔ, ama, bo i koro ka bu kansi sɔnɔ bo i sunma i ni, nyini sɔnɔ ni jɔjɔ nahɔɛ a, na kɔɛ be wo má i ɲu. ¹⁹ M ɲa Moyisi yo maari am Nyɛmɛ nɔaniɛ kpamaawa n a, má sɔ? Ama, am be n mmɔɔ su má i atin su. Ye nzu ti ye am koro ka am kun m a?” ²⁰ Na jama n ase i ka, “Ajini wo u ɲu. Nma koro ka i kun u a?” ²¹ Na Yesu ase bu ka, “Sa kun be lɛɛ, ye ma yo i n a, ye wɔ yo am kɛɛ alekutura n a. ²² Moyisi yo maari am nɔɔ ka am wura am nbaabiɛsɔm kɛnkɛnɛ lemɔcɛ cɛɛn, nzen haari i tɔ Njumiyi cɛɛn n

mmɔɔ, am yo i, ama, má Moyisi yo boori i bu ka bu wura kenkenne n a, am nam yo boori i bu a. ²³ Am wura nbaabiesom kenkenne Njumiyi cɛɛn wɔ, adena má am bu nɔaniɛ kpamaawa n bo Nyɛmɛ fa maari Moyisi ni n̄gbɛɛn, ye nzen ma tuntun sɔnɔ mɔmɔ kun Njumiyi cɛɛn n na wɔ nya laifiɛ, nzu ti ye am afa yaa m n̄u a? ²⁴ Má am niɛ sɔnɔ nyunu dika na am di i jɔrɛ, ama, am si i wo nahɔrɛ su, na am nya di i jɔrɛ.”

Kabo minɛm bisaari ka Yesu ti Kristo Tiidefɔ n a

²⁵ Yesu seeri sɔ ni, na Yerusalemfɔm nbem abisa bu n̄un̄u nu ka, “Má ahin sɔnɔ n ye Yuda-fɔm nkpienkpiɛnm koro ka bu kun i n a? ²⁶ Am niɛ e. Wɔ yi i n̄u fofoe nu ye i jɔjɔ a. Be suse má i pui mmɔɔ. Beni, Yuda-fɔm nkpienkpiɛnm asi ka yiri ti Kristo Tiidefɔ n nahɔrɛ su n a. ²⁷ Ama, saɔga bo Kristo Tiidefɔ n ba baari, be sí má deke bo i fite. Ahin sɔnɔ n yiri, ya si deke bo i fite.” ²⁸ Na saɔga bo Yesu sukere Nyɛmɛ Sereebiri Awuru n nu ni, na wɔ tien faɔga su ase ka, “Am sunsun ka am si m nahɔrɛ su, nzen sɛ? Ye am si deke bo m fite? Ma ba má ni m dɛɛ yiko nu wɔ. Yiri n bo wɔ sunma m ni ti nahɔrɛfɔ a, ama, am si má i. ²⁹ Mini si i a, dama m fite i dɔ ɔ, yiri sunmaari m a.” ³⁰ Nyini ti, na ba kpi ka bu tara i, ama, be afa má i saa akan má i, dama i saɔga nya ju má. ³¹ Na jama n dɔnggu ayo i yarada, na ba se ka, “Saɔga bo Kristo Tiidefɔ n ba baari, i yó alekutura sam tara ahin sɔnɔ n wɔ, nzen sɛ?”

Kabo bu sunmaari tintinijinafom ka bu ko tara Yesu ni

³² Na Farasifom n ati kabo jama n sutu asuturi sukan Yesu jore, na bu ni Nyeme sayoowa dongu-yofo nkpienkpienm n asunma tintinijinafom ka bu ko tara i. ³³ Na wo se ka, "M wo am do sanja kaan, na m nya ba ko yiri n bo i sunmaari m n do. ³⁴ Am ba nienie m busu, na am nu ma. Deke bo m ba wo ni, am koro ko ma do." ³⁵ Na Yudafom nkpienkpienm n abisa bu nju nu ka, "Yiri koro ka i ko ni wo, ye yere koro nu ma i a? I ko ya minem do o, bo ba sandi awura Girikifom asien su ni, na i ko kere Girikifom ni Nyeme jore ni, nzen se a? ³⁶ I na se wo lee? Bo i na ya ba nienie i busu na ya nu ma i ni, na bekun, deke bo i sukoni, ya koro ko ma do."

Kabo sono bo i yo Yesu yarada nya nzue n bo i ma ngoo ni

³⁷ Ceenkpiri n awieeri ceen n ti ceenkpiri n tii a. Nyini ceen n na Yesu ayasu ajina, na wo tien fanga su ase ka, "Sono kere bo nzueho ati i, i mi bra m do na i ba nu. ³⁸ Dama ba kere i Nyeme Jore Kadasi n nu ka, sono kere bo i yo m yarada, 'Nzuetin bo i ma ngoo ni, i songi fite i mi ahorembaa su a.' " ³⁹ Yesu joko niiri Awiewie Casi n wo, ka sono kere bo i yo yiri Yesu yarada nya Awiewie Casi ni. Nyini sanja ni, Nyeme nya fa ma i Awiewie Casi n ma ma, dama wo nya wura ma Yesu kpiri.

Kabo Yesu dee ti, na jama n nwo woori bu ngungumi ni

⁴⁰ Na jama n nu mine nbem tiiri kabo i seeri so ni, na ba se ka, “Ahin sono n ti Nyeme noanie kanfo n wo nahore su.” ⁴¹ Na nbem ase ka, “Yiri ti Kristo Tiidefo n a.” Ama, na nbem gusu ase ka, “Kristo Tiidefo ni fite ma Galili da. ⁴² Ba kere i Nyeme Jore Kadasi n nu ka Kristo Tiidefo ni yo Feme Davidi anuma a, na bu wu i Betlehem, Feme Davidi bosu wo.” ⁴³ Yesu dee ti, na jama n noo awo bu ngungumi, ⁴⁴ na nbem akoro ka bu tara i, ama, be afa ma i saa akan ma i.

Kabo Yudafom nkpienkpienm ayo ma Yesu yarada ni

⁴⁵ Na tintinijinafom n akpie bu nyi ako Nyeme sayoowa doguyofom ni, ni Farasifom n do, na ba bisa bu ka, “Nzu ti ye am afa ma i aba ma?” ⁴⁶ Na tintinijinafom n abo bu nu ka, “Be nya koro jajo ma kabo nyini sono n jajo ni.” ⁴⁷ Na Farasifom n abisa bu ka, “Wo daka ambere gusu wo fan? ⁴⁸ Am nya ti ka Yudafom nkpienkpienm wara Farasifom n be ayo i yarada a? ⁴⁹ Ama, ahin jama n si ma Nyeme noanie kpamaawa ni, nyini ti, Nyeme ayo bu ngbeen.” ⁵⁰ Na Nikodemo bo i ti Farasifom kun n na i yo ko nuuri Yesu ni, ase bu ka, ⁵¹ “Ya dee atin n su, kana ya ba di sono jore jaraki i, ma ka ya bisa i na ya ti sa bo wo yo i n ka.” ⁵² Na ba bisa i ka, “Woro n mmoo fite Galili wo? Kan Nyeme Jore Kadasi n na a nie. A nu ma ka Nyeme noanie kanfo n be mmoo fite Galili.”

[⁵³ Bu se so wieeri ni, na bu kere asandi ako awuru.

8

¹ Na Yesu ako buka n bo bu fere i ka Oliva Buka n su, dama oliva bakam gɔ su wɔ.

Bara ajaafɔ n bo i saakiiri ajaa ciire n jɔrɛ

² Alecin ngarama fuun na Yesu akaaki ako Nyemɛ Sereebiri Awuru n nu. Na jama n kere aba atien bu nɔɔ i dɔ. Na wɔ tana sukere bu Nyemɛ nɔaniɛ. ³ Na Nyemɛ nɔaniɛ kerefɔm, ni Farasifɔm nbem afa bara ajaafɔ be bo bu kɔ taraari i ka i ni biesɔ da, na ba fa i ajina bu afien. ⁴ Na ba se Yesu ka, “Ya Kerefɔ, ya kɔ atara ahin bara n ka i susaaki ajaa ciire wɔ. ⁵ Nɔaniɛ kpamaawa n bo Nyemɛ fa maari Moyisi n kere ka, nyini nbaram ηusu sɔ, ya tu bu yabue bo kun bu. Nyini ti, ye wɔrɔ ηa sɛ?” ⁶ Bu seeri sɔ n na bu sɔ i ηgɛɛ, na bu jaraki i wɔ. Na Yesu abiri i tii asiɛngu sufa i saa maraka sukere asiɛngu. ⁷ Bu wo i bisa n su ni, na wɔ ye i tii su ase bu ka, “Bo i ηa wɔ nya yo má satie am nu, ma i mi du mɔ tu i yabue.” ⁸ Na wɔ kaaki abiri i tii sukere asiɛngu. ⁹ Bu tiiri sɔ ni, na bu kere alɔrɔki kun kun ako. Nkpienm ni du mɔ a. Na wɔ ka Yesu ni bara ni ηgumi. ¹⁰ Na Yesu aye i tii su, na wɔ bisa bara n ka, “Bara, bu wo ni? Be ase má ka i ti ye ni ka bu kun u, nzen sɛ?” ¹¹ Na bara n abɔ i nu ka, “Ai, m Mibiɛ, be ase má ka i kún m.” Na Yesu ase i ka, “Mini mmɔɔ se má ka be kún u. Kɔ, ama, má a yo satie kun.”]

Kabo Yesu ηa yiri ti durunya n nufɔm wein n ni

¹² Na Yesu akaaki ase jama n ka, “Mini ti durunya n nufɔm wein a. Bo i su m su kere wo

má awosin nu kun, ama, i nyá wein bo i ma ngɔɔ ni.” ¹³ Na Farasifom n ase i ka, “Wɔɔɔ, a sudi u ɲu daani wɔ, be de má u daani n ka i ti nahɔɔɔ.” ¹⁴ Na Yesu ase bu ka, “Haari nzen m di m ɲu daani n mmɔɔ, m daani diiwa n ti nahɔɔɔ wɔ, dama m si deke n bo m fite baari, na m kaaki si deke bo m sukɔ ni. Ama, amberɛ, am si má deke bo m fite, na am kaaki si má deke bo m sukɔ n gusu. ¹⁵ Amberɛ, am di jɔɔ kabɔ durunya n nufom di bu bengum jɔɔ n wɔ, ama, mini ni m tii, m di má be jɔɔɔ. ¹⁶ Ama, haari nzen m di mine jɔɔ n mmɔɔ, m jɔɔ diiwa n ti nahɔɔɔ wɔ, dama má mini ɲgumi di minem jɔɔ a, ama, mini ni m Si bo i sunmaari m ni di a. ¹⁷ Ba kɛɛ am Nyɛmɛ nɔaniɛ kpamaawa n nu ka, nzen mine nnyɔ daani diiwa yo kun, nyini la ka i ti nahɔɔɔ wɔ lɛɛ. ¹⁸ Mini ni m tii di m ɲu daani a, na m Si bo wɔ sunma m gusu di m daani.” ¹⁹ Na ba bisa i ka, “U si wo ni?” Na wɔ bɔ bu nu ka, “Am si má m ni m Si n be n mmɔɔ. Nzen má am si mini, má am si m Si n mmɔɔ.”

²⁰ Saɲga bo Yesu seeri sɔ ni, i wo minem kere su Nyɛmɛ Sereebiri Awuru n nu, fa dodo deke bo bu yi bu saraka ɲwaa fa ma Nyɛmɛ n wɔ. Ama, be akoro atara má i, dama i saɲga nya ju má.

Kabɔ Yesu seeri ka i fite má durunya n nu fen ni

²¹ Na Yesu akaaki ase bu ka, “M bá kɔ yaki am, na am bá nienie m busu, ama, am ɲú má m, na am bá wu ni am satie ni. Deke bo m sukɔ ni, am koro kɔ má dɔ.” ²² Na Yudaɔm n abisa ka, “I ɲa deke bo i sukɔ ni, ya koro kɔ má dɔ. Nyini la ka, i kún i ɲu wɔ lɛɛ, nzen sɛ a?” ²³ Na wɔ se bu ka,

“Amberε fite durunya n nu fεn wɔ, ama, mini fite angoro wɔ. Amberε ti durunya n nu fεn fɔm wɔ, ama, mini fite má durunya n nu fεn. ²⁴ Nyini ti ye ma se am ka, am wú ni am satie n a, dama nzen am yo má m yarada ka mini la sɔnɔhɔre n bo m se am ka m ti ni, am wú ni am satie n wɔ.” ²⁵ Na ba bisa i ka, “Ye wɔwɔ la ηma a?” Na Yesu ase bu ka, “Kabo m se am sanɔa kere ni, m ti sɔ ɔ. ²⁶ M la sa dɔŋgu bo m jɔjɔ fa kɔ am dɔ, na m la sa dɔŋgu bo m fa di am jɔre jaraki am, ama, yiri bo i sunmaari m ti nahɔrefɔ ɔ, na deke bo i se m ni, nyini ye m kan kere durunya n nufɔm a.” ²⁷ Yesu seeri sɔ ni, ba si má ka i jɔjɔ niiri i Si Nyeme wɔ. ²⁸ Na wɔ se bu ka, “Am bá yeeri mini Adamande Wa n su baka jaanu n su, ye am sí ka mini la sɔnɔhɔre n bo m se am kabo m ti n a, na m yo má deke be m dεε yiko nu, ama, m se kabo m Si akere m wɔ. ²⁹ Yiri bo i sunmaari m n wo m dɔ, wɔ nya yaki má m cεen be, dama sanɔa kere m yo deke bo i sun i nu wɔ.” ³⁰ I jɔjɔori sɔ ni, na jama n dɔŋgu ayo i yarada.

Kabo Yesu seeri Yudafɔm ka bu satie dεε ti ma ba yo akɔɔm n a

³¹ Na Yesu ase Yudafɔm bo bu yo i yarada n ka, “Nzen am de m nɔaniε ni, am ti m susufɔm wɔ nahɔre su. ³² Na am sí deke bo i ti nahɔre ni, na nahɔre ni má am nya am tii a.” ³³ Na ba se i ka, “Ya ti Abraham anumam wɔ, be nya fa má ya yo má i akɔɔm. Ye nzu ti ye a ηa ya nyá ya tii a?”

³⁴ Na Yesu ase bu ka, “Nahɔre ye m suse am a, ka, sɔnɔ kere bo i yo satie, i mi ti satie akɔɔ.

³⁵ Akɔɔbaa koro ka má awuru n nu sanɔa kere,

ama, awurubaa yiri wo awuru n nu wɔ sanɔa kerɛ. ³⁶ Nyini ti, nzen mini awurubaa n nya deerɛ am tii jiiri, am nyá am tii nahɔre su. ³⁷ M si ka am ti Abraham anumam wɔ, ama, am koro ka am kun m wɔ, dama am ade má m nɔaniɛ ni. ³⁸ Deke bo mini aɔu i m Si dɔ n ye m suse am a, ama, amberɛ, deke bo am ti i am si dɔ, ye am yo a.” ³⁹ Na ba se i ka, “Ya si la Abraham.” Na wɔ se bu ka, “Nzen má am ti Abraham nbaam, má am yo i sayoowa a. ⁴⁰ Kabo i ti ni, ma se am nahɔre sam bo m tiiri i Nyeme dɔ n wɔ, ama, am koro ka am kun m wɔ. Abraham ayo má nyini be sɔ. ⁴¹ Amberɛ, am yo am si sayoowa a.” Na ba se i ka, “Yere, ya ti má soma nbaam. Ya si la Nyeme ɔgumi wɔ.” ⁴² Na Yesu ase bu ka, “Nzen má Nyeme ti am Si, má am koro m, dama m fiteeri Nyeme dɔ ɔ, ye m baari fen n a. Ma ba má ni m deɛ yiko nu, ama, yiri sunmaari m a. ⁴³ Nzu ti ye am ti má m jɔjɔowa n bu a? Dama am koro de má m nɔaniɛ n deɛ ti. ⁴⁴ Sitana ti am si wɔ, na am koro ka am yo kabo am si koro n wɔ, i fite ka i bumboori kerɛ, i ti sɔnɔ kunfɔ ɔ, na i su má nahɔre su, dama nahɔre haari kun mmɔɔ wo má i dɔ, i deɛ la ka i bu kɔre wɔ, dama yiri ti kɔrefɔ a, na yiri kaaki ti kɔrefɔm kerɛ si a. ⁴⁵ Ama, mini se nahɔre n ti, am de má m nɔaniɛ ni. ⁴⁶ Am ɔma koro kere m satie bo ma yo i a? Nzu ti ye m se am nahɔre, ye am de má m nɔaniɛ n a? ⁴⁷ Sɔnɔ kerɛ bo i ti Nyeme deɛ, i mi ti Nyeme nɔaniɛ wɔ. Deke bo i ti na am ti má Nyeme nɔaniɛ n la ka, am ti má i deɛm wɔ.”

Kabo Yesu ti kpiri tara Abraham ni Nyeme

nɔ́aniɛ kanfɔ́m ni

⁴⁸ Na Yudafɔ́m n ase i ka, “Bo ya ɲa a ti Samariyafo ɔ, na ajini wo u ɲu ni, i ti má nahɔ́re wɔ, nzen se a?” ⁴⁹ Na Yesu ase bu ka, “Ajini wo má m ɲu, ama, m bu m Si n wɔ, ye amɛɛ bu má m. ⁵⁰ M sukoro má ka mine wura m ɲu kpiri wɔ, be wo ɛɛ bo i koro ka i wura m kpiri, yiri ti jɔ́redifo a. ⁵¹ Nahɔ́re ye m suse am a, ka, sɔ́nɔ kɛɛ bo i bita m nɔ́aniɛ ni, i mi wú má fieo.”

⁵² Na ba se i ka, “Kisa, ye ya si ka ajini wo u ɲu a. Abraham ni Nyeme nɔ́aniɛ kanfɔ́m ni kɛɛ awu, ama, wɔ́wɔ ɲa sɔ́nɔ kɛɛ bo i bita u nɔ́aniɛ ni, i mi wú má fieo. ⁵³ A tara ya si Abraham bo wɔ wu n wɔ? I ni Nyeme nɔ́aniɛ kanfɔ́m kɛɛ awu. A bu u ɲu se wɔ?”

⁵⁴ Na Yesu ase bu ka, “Nzen m wura m ɲu kpiri, i ti ɲɔ́ɛɛn wɔ. M Si wura m kpiri a, yiri bo am ɲa i ti am Nyeme ni, ⁵⁵ ama, am si má i. Mini si i a. Haari nzen m ɲa m si má i, m yó kɔ́ɛfo ka amɛɛ wɔ. Ama, m si i, na m bita i nɔ́aniɛ ni. ⁵⁶ I yoori am si Abraham fie ka i ɲu m ba n nu, i ɲuuri i, na i ahore ajo.” ⁵⁷ Na ba se i ka, “A nya ju má afo aburunu, ye i yo se ye a ɲa a ɲuuri Abraham a?” ⁵⁸ Na Yesu ase bu ka, “Nahɔ́re ye m suse am a, kana bu ba wuuri Abraham ni, mini wo ɛɛ wɔ.” ⁵⁹ I seeri sɔ́ ni, na ba fa yabuɛ ka bu bo kun i, ama, na wɔ lɔ́rɔ́ki afite Nyeme Serebiri Awuru n nu.

9

Kabo Yesu tekeeri anyinsin be nyumbaa ni

¹ Na sanƙa bo Yesu wo natiiri su ni, na wo ɗu sɔnɔ be, bu wuuri i ni, i ti anyinsin wo. ² Na i susufɔm n abisa i ka, “Ya Kerefɔ, nzu ti ye bu wuuri ahin sɔnɔ ni anyinsin a? I wufɔm yoori satie, nzen i dɛɛ satie a?” ³ Na Yesu ase bu ka, “I ti má i ni i wufɔm be mmɔɔ satie dɛɛ ti, ama, Nyɛmɛ koro ka minɛm ɗu kabo i yo alekutura sa fa ma i a. ⁴ Kabo wie toko wo bɛrɛ ni, am ma ya yo yiri n bo wo sunma m juma ni. Ale bá san bo be koro yo má juma be. ⁵ Kabo m toko wo durunya n nu ni, mini ti durunya n nufɔm wein a.”

⁶ Yesu seeri sɔ ni, na wo yi nanzue ago asiɛɗgu, na wo fa akpita naatie afa abɔrɔki anyinsin nyumbaa nnyɔ n kerɛ. ⁷ Na wo se i ka, “Kɔ na a kɔ ɗmisi u nyunu Silowam bura n nu.” Silowam n bu la ka, ba sunma i wo. Na wo kɔ aɗmisi i nyunu n na wo ɗu asi, na wo kaaki aba awuru.

⁸ Na i lamɔkɔm ni minɛm bo bu yo ɗuuri i sanƙa kerɛ ka i sere ni, abisa ka, “Má ahin sɔnɔ ni yo tana fen sere n a?” ⁹ Nbem ɗa, “Yiri a.” Nbem gusu ɗa, “Má yiri a. I feremafo a.” Na yiri n mmɔɔ ni i tii suse bu ka, “Mini a.” ¹⁰ Na ba bisa i ka, “Ye i yoori sɛ ye u nyumbaa n ateke a?” ¹¹ Na wo se bu ka, “Sɔnɔ n bo bu fere i ka Yesu ni, yiri kpitaari naatie bɔrɔkiiri m nyumbaa n a. Na wo se m ka m kɔ Silowam bura n nu, na m kɔ ɗmisi m nyunu. Na ma kɔ aɗmisi, kpenƙa na ma ɗu asi.” ¹² Na ba bisa i ka, “Ye yiri n wo ni?” Na wo se bu ka, “M si má.”

Kabo Farasifɔm bisaari sɔnɔ n fa kɔ i nyumbaa tekewa n su ni

¹³ Na ba fa sɔnɔ n bo i yo tiiri anyinsin n ako Farasifɔm dɔ. ¹⁴ Nyini cɛɛn n bo Yesu kpitaari naatiɛ na i fa tekeeri anyinsin nyumbaa n tiiri Njumiyi cɛɛn wɔ. ¹⁵ Nyini ti, na Farasifɔm gusu akaaki abisa i ka, “I yoori sɛ ye a ɲuuri asi a?” Na wɔ se bu ka, “I faari naatiɛ bɔrɔkiiri m nyumbaa n a, na ma ɲmisi i, na ma ɲu asi.” ¹⁶ Na Farasifɔm nbem ase ka, “Ahin sɔnɔ n fite má Nyeme dɔ, dama i bita má Njumiyi cɛɛn ciire ni.” Ama, na nbem gusu ase ka, “I yo sɛ ye satieyofɔ koro yo alekutura sam ka ahin ɲusu sɔ a?” Na bu kɛɛ nɔɔ awo i ɲgungumi. ¹⁷ Na ba kaaki abisa sɔnɔ n bo i yo tiiri anyinsin bekun ka, “Ye wɔrɔ bo wɔ teke u nyumbaa ni, a bu i sɛ wɔ?” Na wɔ se ka, “I ti Nyeme nɔaniɛ kanfɔ ɔ.”

¹⁸ Yudafo nkpienkpienm n ade má ka i yo tiiri anyinsin wɔ, ye i ɲu asi kisa, má ka bu ba fereeri i si, ni i ni, ¹⁹ na ba bisa bu ka, “Am wa n bo am ɲa am wuuri i na i ti anyinsin ni, yiri la ahin? Ye i yoori sɛ ye i ɲu asi kisa a?” ²⁰ Na i si, ni i ni abɔ bu nu ka, “Ya si i ka i ti ya wa a, ya wuuri i anyinsin wɔ. ²¹ Ama, ya si má kabo i yoori barasu na i koro ɲu asi kisa ni, yeɛ gusu kaaki si má sɔnɔ bo i tekeeri i nyumbaa ni. Wɔ ju i tienɲu sɔnɔ, am bisa i, yiri mmɔɔ ni i tii sé am.” ²² Deke bo i ti na i si, ni i ni seeri sɔ ni, bu soroori Yudafo nkpienkpienm n ahore wɔ, dama Yudafo nkpienkpienm n adu mɔ ase ka sɔnɔ kɛɛ bo i seeri ka Yesu ti Kristo Tiidefo ni, bu fɔn i mi fite bu tientienbunɔɔ sɔɔ n nu wɔ. ²³ Nyini dɛɛ ti ye i si, ni i ni seeri ka, “Wɔ ju i tienɲu sɔnɔ, am bisa yiri mmɔɔ ni i tii n a.”

²⁴ Na ba kaaki afere sɔnɔ n bo i yo tiiri anyinsin

n bekun, na ba se i ka, “Niε Nyεmε ti, na a jɔjɔ nahɔrε. Yεrε si ka ahin sɔnɔ n ti satieyofɔ ɔ.”
²⁵ Na wɔ se bu ka, “Nzen i ti satieyofɔ ɔ, i ti má satieyofɔ ɔ, mini si má. Deke bo m si i n la ka, m yo tiiri anyinsin wɔ, ama, kisa m ηu asi.”
²⁶ Na ba bisa i ka, “I yoori u sε wɔ, ye i tekeeri u nyumbaa n sε wɔ?”
²⁷ Na wɔ bɔ bu nu ka, “Ma du mɔ ase am kabo i tekeeri m nyumbaa ni, ye am ade má. Ye nzu ti ye am koro ka m kan kere am bekun a? Amberε gusu, am koro ka am yo i susufɔm wɔ, nzen sε?”
²⁸ Na ba tɔ i ηu ni nzukɔ kpie ase i ka, “Wɔrɔ ti nyini sɔnɔ n susufɔ a, yere yiri, ya ti Moyisi dεε susufɔm wɔ.
²⁹ Ya si ka Nyεmε yo jɔjɔri Moyisi dɔ a, ama, nyini sɔnɔ n yiri, ya si má i fiteebiri n mmɔ.”

³⁰ Na wɔ se bu ka, “Ahin ti alekutura wanla, am si má i fiteebiri, ama, wɔ teke m nyumbaa.
³¹ Ya si ka Nyεmε de má satieyofɔ nyemesere, ama, sɔnɔ kere bo i su Nyεmε atin su, na i yo i sa koroowa, Nyεmε de i sere wɔ.
³² Fite durunya n bumboori, sɔnɔ be nya ti má ka be ateke sɔnɔ bo bu wuuri i na i ti anyinsin nyumbaa.
³³ Nzen má ahin sɔnɔ n afite má Nyεmε dɔ, má i koro yo má pui.”
³⁴ Na ba se i ka, “Wɔrɔ yiri, bu wuuri u satieyofɔ ɔ, ye wɔrɔ koro ka a kere yere a?” Na ba fɔn i afite.

Kabo Yesu ηa bo bu de má Adamande Wa n ti anyinsinm ni

³⁵ Yesu tiiri ka ba fɔn ayi sɔnɔ n ni, na wɔ kɔ aηu i, na wɔ bisa i ka, “A yo Adamande Wa n yarada a?”
³⁶ Na sɔnɔ n abisa i ka, “M Mibiε, yiri la ηma a? Se m na m yo i yarada.”
³⁷ Na Yesu

ase i ka, “A ɲu i e, yiri la mini n bo m sujɔɔ u dɔ ni.” ³⁸ Na sɔɔ n ase i ka, “M Mibiɛ, ma yo u yarada.” Na wɔ kutu Yesu nyunu akansi i.

³⁹ Na Yesu ase ka, “M baari durunya n nu ka m ba di minem jɔɔ wɔ, na bo bu ɲu má asi n ɲú asi, na bo bu ɲu asi n yó anyinsinm.” ⁴⁰ Farasifɔm nbem bo bu woori i bi dɔ n tiiri sɔ ni, na ba se i ka, “Nka a ɲa a se ka yeɛ gusu ti anyinsinm wɔ lɛɛ fan?” ⁴¹ Na Yesu ase bu ka, “Nzen má am ti anyinsinm, má am la má ɲgasi, ama, kabo am nya ɲa am ɲu asi ni, am toko la ɲgasi lɛɛ.”

10

Kabo Yesu boori miɛenu niiri bɔɛsasafɔ ni

¹ Na Yesu ase ka, “Nahɔɛ ye m suse am a, sɔɔ bo i lɔɔki wura nbɔɛm sɔɔ n nu, na wɔ fa má anɔ n nu awura má, i mi ti awiefɔ ɔ, na i kaaki ti sɔɔ bo i nati fin minem di wɔ. ² Sɔɔ bo i fa anɔ n wura nbɔɛm sɔɔ n nu, yiri ti nbɔɛm sasafɔ n a. ³ Anɔ niefɔ ni teke anɔ n ma i a, na i fere i dɛɛ nbɔɛm n duma, na i nbɔɛm ni ti i konvi, na i fa bu fite. ⁴ Nzen i nya faari i nbɔɛm kɛɛ fiteeri, i du bu mɔ ɔ, na i dɛɛ nbɔɛm n su i su, dama bu si i konvi. ⁵ Sɔɔ bo bu si má i, bu sú má i su fieo, bu ɲmáti yaki i wɔ, dama bu si má i konvi.”

⁶ Na Yesu abo ahin miɛenu n akere bu, ama, ba ti má i bu.

Kabo Yesu ɲa yiri ti bɔɛsasafɔ kpa n ni

⁷ Ba ti má miɛenu n bu n ti, na Yesu akaaki ase bu bekun ka, “Nahɔɛ ye m suse am a, mini ti nbɔɛm anɔ n bo bu fa wura sɔɔ n nu n a. ⁸ Bɛɛ kɛɛ bo bu duuri m mɔ baari, na bu yo bu ɲu ka bu niɛ nbɔɛm su ni, bu ti awiefɔm wɔ, ni minem

bo bu nati fin minem di wo, ama, nbɔem n ade má bu jɔjɔwa ni. ⁹ Mini ti anɔ n a, na sɔnɔ kere bo i fa m dɛɛ anɔ n wuraari, i nyá tiide, na i wúra na i fite, na i nyá i diire di. ¹⁰ Awiefɔ dɛɛ la ka i ba wo ɔ, na i kun, na i saaki. Mini aba ka bu nyá ngɔɔ bo i la má anusu.

¹¹ Mini ti bɔesasafo kpa n a. Bɔesasafo kpa n tɔ i ngɔɔ ɔ, na i wu ma i nbɔem ni. ¹² Padifo n bo ba fa i ka i sasa nbɔem n ti má bɔesasafo nahɔre su, na nbɔem n ti má i dɛem. Nyini ti, nzen i ba ŋuuri ka bedi suba, i ŋmati yaki nbɔem wo. Na bedi n wura bu nu tara nbem, na bo ba ka n sandi. ¹³ I ti padifo n dɛɛ ti, na i cɛɛ wo má nbɔem n nu, nyini ti ye i ŋmati yaki bu n a. ¹⁴⁻¹⁵ Mini ti bɔesasafo kpa n a. Kabo m Si Nyeme si m na m si i ni, sɔ ye mini gusu si m dɛɛ nbɔem a, na bu gusu si m. Na m tɔ m dɛɛ ngɔɔ na m wu ma bu. ¹⁶ M la nbɔe nyiŋga nbem bo bu ti m dɛem, bo bu wo má ahin nbɔem n nu. Wo yo daka ka m fa bu gusu ba wura ahinm n nu. Bere gusu tí m konvi na bu dé i, na bu yó kun na bu sasafɔ yó kun. ¹⁷ M tɔ m dɛɛ ngɔɔ fa ma m minem, na m káaki de i bekun, nyini dɛɛ ti ye m Si koro m n a. ¹⁸ Be sude má m dɛɛ ngɔɔ ni m dɔ, ama, mini ni m tii sutɔ i m koroyanu a. M la atin bo m tɔ m dɛɛ ngɔɔ ni, na m kaaki la atin bo m de i bekun. M Si maari m nɔɔ ka m yo sɔ a.”

¹⁹ Yesu seeri sɔ n dɛɛ ti, na Yudafɔ nkpien-kpienm n nɔɔ awo i ŋgunɔgumi bekun. ²⁰ Na bu dɔŋgu n ase ka, “Ajini wo i ŋu, nyini dɛɛ ti, wo bo fie a. Nzu ti ye am so am sui i dɔ a?” ²¹ Ama, nbem ŋa, “Má sɔnɔ bo ajini wo i ŋu jɔjɔwa la

ahin. Ajini yo se koro teke anyinsin nyumbaa?"

Kabo Yudafom keteeri Yesu ni

²² Fufuku sanja na Yudafom ba sudi bu cɛɛn-kpiri n Yerusalem mie kpiri n nu, na bu tenge su kabo bu yo tekeeri Nyeme Sereebiri Awuru n ni, na bu yoori i dongu ni. ²³ Na Yesu sunati bara ye Solomon Lele n bo i wo Nyeme Sereebiri Awuru n nu ni. ²⁴ Na Yudafom nbem atien bu non abara aye i, na ba bisa i ka, "Sanja bono ye a ba kan teke ya nyi a? Nzen wono ti Kristo Tiidefo n a, se ya nahore kpain." ²⁵ Na Yesu ase bu ka, "Ma se am, ye am ade ma a. Alekutura sam bo m yo bu m Si duma n nu ni, di m nu daani a. ²⁶ Ama, am yo ma m yarada, dama am ti ma m deɛ nbɛm. ²⁷ M deɛ nbɛm ti m konvi. M si bu, na bu su m su. ²⁸ M ma bu ngon bo i la ma awieeri, na bu ka ma ngbɛɛn cɛɛn be fieo. Be gusu koro fin ma bu fite ma m saa nu. ²⁹ M Si bo i faari bu maari m ni, tara deke kere fanga, na be wo ma bere bo i koro fin bu fite m Si saa nu. ³⁰ Mini ni m Si ti deke kun wo."

³¹ Na Yudafom afa yabue bekun ka bu bo kun i. ³² Na Yesu ase bu ka, "Ma yo alekutura sakpam dongu, bo m Si kereeri m na am anu i, ye sa bono ti ye am na am kun m n a?" ³³ Na Yudafom n ase i ka, "Ma sakpam bo a yo bu n be deɛ ti ye ya na ya kun u a, ama, bo a jon wura Nyeme ngasi nu n ti, dama a ti adamande wo, ama, na a se ka a ti Nyeme wo." ³⁴ Na wo se bu ka, "Ba kere i am Nyeme Jore Kadasi n nu ka, Nyeme na, 'Am ti ka Nyeme wo.' ³⁵ Be koro bu ma Nyeme Jore Kadasi ni ngbɛɛn. Nyeme yo seeri bu ka bu ti ka Nyeme wo, bere bo bu deeri Nyeme nonie

ni, ³⁶ ama, mini yiri, m Si Nyeme ayi m, ye wo sunma m durunya n nu a. Ye nzu ti ye amberε nja ma kan ciire jore, dama m nja mini ti Nyeme Wa a? ³⁷ Nzen m yo má m Si juma ni, má am yo m yarada. ³⁸ Ama, nzen m yo bu na haari am yo má m yarada mmoo a, am yo m juma n yarada, adena am si nahore su ka mini ni m Si n ti deke kun wo.” ³⁹ I seeri so ni, na ba kpi ka bu tara i bekun, na wo loroki afite bu nu.

⁴⁰ Na Yesu akaaki akpie ako Yodan kunma n buekun do ako aju deke bo Yohane yo biεeri minem Nyeme nzue ni, na wo wo do. ⁴¹ Na jama beberebe aba i do, na ba se ka, “Yohane ayo má alekutura sa be, ama, jooowa kere bo i yo joo fa koori ahin sono n nusu n ti nahore wo.” ⁴² Na mine dongu ayo i yarada do.

11

Kabo Lazarosi wuuri ni

¹ Na sono be bo bu fere i ka Lazarosi n ada tukpaki. I ninbaam la Mariya ni Marata. Bu bosu la Betani. ² Nyini Mariya n bo i niwa Lazarosi daari tukpaki ni, yiri ba faari tulaaleε nvanvanifo goori Yesu jaa su ye i faari i tiinjmie tintiin nunukaari i n a. ³ Na i ninbaa nbaabaram n asunma ka bu ko se Yesu ka, “Ya Mibiε, u danfo n bo a koro i agaya n ada tukpaki.” ⁴ Yesu tiiri so ni, na wo se ka, “Ahin tukpaki n ti má yiwee tukpaki, ama, i yo so, na minem nu Nyeme jirima woowa kabo i ti, na Nyeme ma minem nu mini bo m ti i Wa n gusu jirima woowa.” ⁵ To, Yesu koroori Marata ni Mariya ni bu niwa Lazarosi.

⁶ Ama, i tiiri ka Lazarosi ada tukpaki ni, na wɔ ka deke bo i woori n cɛɛn nnyɔ abuka su.

⁷ Nyini sin na Yesu ase i susufɔm ka, “Am ma ya kaaki kɔ Yudiya dɛɛ awɔrɛ n nu.” ⁸ Na i susufɔm n ase i ka, “Ya Kerefɔ, má anzɔni fɛn ye Yudafɔm ɲa bu tu yabuɛ bo kun u n a? Ye a sukoro ka ya kpɛ ya nyi kɔ dɔ bekun n a?”

⁹ Na Yesu ase bu ka, “Fa ɲgarama kɔ ju naaso, m ɲa i ti wiɛ kun wɔ e. Sɔnɔ bo i nati wiɛsu bo má i jaa, dama durunya n nu wein ni ma i ɲu asi a. ¹⁰ Ama, sɔnɔ bo i nati kɔɲguɛ bo i jaa, dama wein wo má i dɔ.”

¹¹ Yesu jɔjɔri sɔ n sin, na wɔ kaaki ase bu ka, “Ya danfo Lazarosi adaafi, ama, m sukɔ na m kɔ tenge i lɛɛ.” ¹² Na i susufɔm n ase i ka, “Ya Mibiɛ, nzen wɔ daafi wɔ, i nyá laifiɛ.”

¹³ Kabo Yesu seeri n la ka, Lazarosi awu wɔ, ama, i susufɔm bɛrɛ sunsun ka i ɲa wɔ daafi nahɔrɛ su wɔ. ¹⁴ Nyini ti, na Yesu ase bu kpain ka, “Lazarosi awu. ¹⁵ Ama, amɛrɛ dɛɛ ti, wɔ yo m fiɛ ka ma wo má dɔ, adena am yo yarada. Am ma ya kɔ i dɔ.”

¹⁶ Na Tomasi bo bu fere i ka Ndaa n ase i lamɔkɔ susufɔm n ka, “Am ma yere gusu kɔ, nzen bu kɔ kuunri i a, na ya ni yiri kɛrɛ awu.”

Kabo Yesu ɲa yiri tenge minɛm yiwee nu ni

¹⁷ Saɲga bo Yesu kɔ juuri ni, i ɲuuri ka ba se Lazarosi i lenna lɛɛ. ¹⁸ Betani ni Yerusalem miɛm waari má ni i bɛɲgu. ¹⁹ Na Yudafɔm dɔɲgu aba Marata, ni Mariya dɔ ka bu ba dada bu ahore, bu niwa n bo wɔ wu n dɛɛ ti. ²⁰ Marata tiiri ka Yesu suba ni, na wɔ kpa i atin, ama, na Mariya aka awuru. ²¹ Na Marata ase Yesu ka, “M Mibiɛ, nzen

má a woori fɛn, má m niwa n awu má. ²² Ama, haari ni nyini mmɔɔ, m si ka deke kɛɛ bo a sere Nyɛmɛ, i yó i ma u.” ²³ Na Yesu ase i ka, “U niwa ni tɛnge i yiwee n nu bekun.” ²⁴ Na Marata ase i ka, “M si ka i bá tɛnge i yiwee nu jina cɛɛn, saɲga bo Nyɛmɛ bá tɛnge minɛm bu yiwee nu ni.” ²⁵ Na Yesu ase i ka, “Mini ti sɔnɔ bo i tɛnge minɛm bu yiwee nu, na i má bu ɲɔɔ n a. Sɔnɔ kɛɛ bo i yo m yarada, haari nzen i wuuri, i nyá ɲɔɔ. ²⁶ Na sɔnɔ kɛɛ bo i la ɲɔɔ na i yo m yarada, i mi wu má fieo. A yo ahin jɔjɔwa n yarada a?” ²⁷ Na Marata ase i ka, “M Mibiɛ, ma yo yarada ka wɔɔ ti Nyɛmɛ Wa, Kristo Tiidefɔ n a, bo i ɲa i súnma i durunya n nu ni.”

Kabo Yesu suunri ni

²⁸ Marata seeri sɔ n sin, na wɔ kaaki ako afere i niwa Mariya benlɛ, na wɔ se i ka, “Ya Mibiɛ n aba, i ɲa a bra.” ²⁹ Mariya tiiri sɔ ni, i kaba bereki yasuri wɔ, na wɔ kɔ i dɔ. ³⁰ Nyini saɲga, na Yesu nya ju má miɛ n nu, i toko wo deke bo Marata kɔ tuuri i n wɔ. ³¹ Na Yudafɔm bo bu woori awuru n nu Mariya bi, na bu sudada i ahore ni, bu ɲuuri kabo i bereki yasu fiteeri ni, na ba su i su. Bu sunsuunri ka i sukɔ deke bo bu seeri Lazarosi n wɔ, na i kɔ sun. ³² Saɲga bo Mariya kɔ juuri deke bo Yesu wo n na i ɲuuri i ni, na wɔ kutu i nyunu, na wɔ se i ka, “M Mibiɛ, nzen má a woori fɛn, má m niwa n awu má.” ³³ Yesu ɲuuri ka i susun ni, ni kabo Yudafɔm n bo bu suuri i su baari n gusu wo sun su ni, na i ahore asaaki, na wɔ mi i ɲumi. ³⁴ Na wɔ bisa bu ka, “Am seeri i ni wɔ?” Na ba se i ka, “Ya Mibiɛ, bra na a ba nie.” ³⁵ Na Yesu asun. ³⁶ Nyini ti na

Yudafom n ase ka, “Am nie kabo i koro i agaya barasu a.” ³⁷ Ama, na bu nbem ase ka, “Yiri n bo i teke anyinsin n nyumbaa ni, má i koro tuntun má sɔnɔ ni, na i wu má, nzen se?”

Kabo Yesu tengeeri Lazarosi i yiwee nu ni

³⁸ Na Yesu ahore asaaki bekun, na wɔ kɔ deke bo bu seeri Lazarosi ni. I ti yabue buɛ faɲkunma wɔ, ye bu faari i seeri nu a, na ba fa yabue nyinga atɔ anɔ ni. ³⁹ Na Yesu ase bu ka, “Am ba yi yabue ni.” Na sɔnɔ n bo wɔ wu n niwa Marata ase i ka, “M Mibiɛ, kisa wɔ bun, dama bu seeri i nyuma lenna lɛɛ.” ⁴⁰ Na Yesu ase i ka, “Ma se má u ka, nzen a yoori m yarada, a nɔ́ Nyeme jirima woowa kabo i ti barasu?” ⁴¹ I seeri sɔ ni, na ba lakati yabue ni. Na wɔ ye i tii su aɲgoro, na wɔ se ka, “M Si, m da u asi ka a de m sere. ⁴² M si ka sanɲa kere a de m sere wɔ, ama, ahin minem bo bu jina fen n dɛɛ ti, ye m seeri sɔ a, adena bu yo m yarada ka wɔɔ sunmaari m a.” ⁴³ I sereeri Nyeme n wieeri ni, na wɔ tien ase ka, “Lazarosi, fite.” ⁴⁴ Na sɔnɔ n bo wɔ wu n afite faɲkunma n nu. Tani pɔɔndiiri i saa, ni i jaa, na tani kun pɔɔndiiri i tii. Na Yesu ase bu ka, “Am nyaɲgi yi tani n na am ma i kɔ.”

Kabo bu sesɛeri su ka bu kun Yesu ni

⁴⁵ Yudafom dɔɲgu bo bu baari Mariya dɔ nɔuri sa n bo Yesu yoori i ni, na ba yo i yarada. ⁴⁶ Na bu nbem akɔ Farasifom n dɔ akɔ ase bu kabo Yesu ayo ni. ⁴⁷ Na Farasifom ni Nyeme sayoowa dɔɲguyofɔ nkpienkpienm n afere Yudafom tere-terefom ni, na ba tien bu nɔɔ. Na ba se ka, “Ye ya yo se wɔ? Am nie e, ahin sɔnɔ ni suyo alekutura

sayoowam dɔŋgu. ⁴⁸ Nzen ya yaki i na i suyo sɔ, minem kere yó i yarada a, na Roma yikofɔm bá saaki ya Nyeme Sereebiri Awuru ni, na bu kún ya minem ni.” ⁴⁹ Na bu nu sɔnɔ be bo bu fere i ka Kayafasi ni, bo i ti Nyeme sayoowa dɔŋguyofɔm kere kpien nyini afɔ n ase ka, “Amberɛ, am si má pui. ⁵⁰ Am si má kabo i ti n wɔ, nzen se? Ka nzen am ma sɔnɔ kun wu maari minem kere, i ti ye ni bo ya minem kere bá wu ni.” ⁵¹ Má i koroyanu ye i seeri sɔ a, ama, yiri ti Nyeme sayoowa dɔŋguyofɔm kere kpien nyini afɔ n ti, ye Nyeme ma i seeri ka Yesu wú ma Yudafɔm n a. ⁵² Na má bere ŋgumi dɛɛ ti ye i wú a, ama, adena i tien Nyeme nbaam nɔɔ, na bu yo kun, bere bo ba sandi akɔ asien nbem n su. ⁵³ Nyini dɛɛ ti, fite nyini cɛɛn n fa kɔ, na ba sese su ka bu kun Yesu.

⁵⁴ Nyini dɛɛ ti, wɔ yi má i ŋu fofoe nu anati má Yudafɔm nu kun. Ama, i fiteeri bere ni, na wɔ kɔ awɔre be bo i wo dodo boro kpantain dɛɛ bue ni, na i ni i susufɔm n akɔ awo mie n bo bu fere i ka Efrayim n su.

⁵⁵ Nyini sanɔa, wɔ ka kaan, na Yudafɔm di bu Butara cɛɛnkpiri ni, na mine dɔŋgu afite ahemem aba Yerusalem mie kpiri n nu, na bu ba kpakpara bu ŋu fin ka, na cɛɛnkpiri n nya ju. ⁵⁶ Na ba niɛniɛ Yesu busu, na sanɔa bo bu wo Nyeme Sereebiri Awuru n nu ni, na ba bisa bu ŋuŋu nu ka, “Am sunsun se wɔ? I bá cɛɛnkpiri ni? Ya de má ka i bá.” ⁵⁷ Ama, Nyeme sayoowa dɔŋguyofɔ nkpienkpienm ni, ni Farasifɔm n ama nɔɔ ka sɔnɔ kere bo i si deke bo Yesu wo, i se bu na bu kɔ tara i.

12

Kabo Mariya faari tulaaleε nvanvanifo gɔɔri Yesu jaam su ni

¹ Na sanɓa bo i ba kaari lesen, na bu di Butara cɛenkpiri ni, na Yesu akɔ Betani, Lazarosi bɔsu, yiri bo Yesu tengeeri i yiwee n nu ni. ² Na ba su Yesu wɔfo dɔ. Marata faari diire n ba maari bu a, Lazarosi gusu woori minem bo bu ni Yesu diiri diire n nu. ³ Na Mariya afa tulaaleε nvanvani bo i la gɔ agaya tuwa bambaka kun, na wɔ fa agɔ Yesu jaa su, na wɔ fa i tiɩmɩε tintiin anunuka i jaam kere su, na tulaaleε ni nvani ade awuru n kere. ⁴ Na Yesu susufom kun bo bu fere i ka Yudasi Isikariyoti bo i bá tɔ Yesu n abisa ka, ⁵ “Nzu ti ye bara n atɔ má tulaaleε n na i nya nɔwaa beberebe, na ya fa ma yaarifom a?” ⁶ I ti awiefɔ n dɛɛ ti ye i seeri sɔ a, má ka i cɛɛ wo yaarifom nu wɔ. Yiri ti bu nɔwaa bitafɔ a, na i suwɔ nɔwaa n be sanɓa sanɓa. ⁷ Na Yesu ase ka, “Yaki Mariya benle, i dɛɛ nzee bo i sufa yo m fa kɔ m yiwee cɛen leε. ⁸ Dama am ni yaarifom ni wo bere sanɓa kere a, ama, am ni mini koro wo má bere sanɓa kere.”

⁹ Yudafom beberebe tiiri ka Yesu woori dɔ ni, na ba ba i dɔ, má ka Yesu nɔgumi ti ye bu baari a, ama, bu baari ka bu ba nɔ Lazarosi n bo Yesu tengeeri i yiwee n nu n wɔ. ¹⁰ Nyini dɛɛ ti, na Nyeme sayoowa dɔnguyofɔ nkpienkpienm n asese su ka bu kun Lazarosi gusu. ¹¹ Dama i dɛɛ ti ye Yudafom dɔngu akaaki bu sin abo bu a, ye ba yo Yesu yarada n a.

Kabo Yesu wuraari Yerusalem ka fεme dεε su ni

¹² Na alecin na jama n bo bu baari ka bu ba di Butara cεenkpiri n ati ka Yesu suba Yerusalem miε kpiri n nu. ¹³ Na ba kpiekpie kpakpa nyawa akɔ akpa i atin, na bu subo kuyigindi, bu ηa, “*Hosana*. Ya kansi Nyεmε.

Terefiε wo yiri n bo i suba Micεra n dεε duma n nu n dɔ.

Terefiε wo Yisarelifɔm fεmε n dɔ.”

¹⁴ Na Yesu aηu kaakobaa be, na wɔ fun atana su, kabo ba kεrε i Nyεmε Jɔrε Kadasi n nu ni,

¹⁵ “*Ambere Siyonfɔm, má am soro sere.*

Am niε, am fεmε ni suba n a,
i fun kaakobaa wɔ.”

¹⁶ Nyini saηga, i susufɔm nya si má nyini sam n bo ba yo n kεrε bu. Má ka saηga bo Yesu ba tengeeri i yiwee n nu, na bu ηuuri i jirima woo-wa n sin, na ba nya atenge su, ka ba kεrε i Nyεmε Jɔrε Kadasi n nu ka bu yó i sɔ ɔ, na ba kaaki atenge su, ka ba yo i sɔ nahɔrε su. ¹⁷ Na jama n bo bu yo woori Yesu dɔ, saηga n bo i fereeri Lazarosi fiteeri faηkunma n nu, na i tengeeri i yiwee n nu ni, na bu sukan labari ni. ¹⁸ Nyini alekutura sa n bo i yoori i na minem tiiri n dεε ti, na ba kpa i atin. ¹⁹ Na Farasifɔm n ase bu ηuηu nu ka, “*Am aηu má i? Ya koro yo má pui kun. Yiri ye durunya n nufɔm kεrε susu i su n a.*”

Kabo Girikifɔ nbem ba bisaari Yesu busu ni

²⁰ Minem bo bu baari Yerusalem miε kpiri n nu Butara cεenkpiri n saηga n ka bu ba su Nyεmε ni, bu nbem ti Girikifɔm wɔ. ²¹ Na ba ba Filipu dɔ, i fite miε n bo bu fere i ka Besayida na i wo

Galili awɔre n nu n wɔ. Na ba se i ka, “Njabis, ya koro ka ya ŋu Yesu wɔ.” ²² Na Filipu ako ase Andere, na bu nnyɔ n kere ako ase Yesu. ²³ Na Yesu ase ka, “Sanga n aju bo Nyeme wura mini Adamande Wa n kpiri. ²⁴ Nahore ye m suse am n a, ma ka asembaa awura fa nu, na wo kpɔɔ, i ti i tii wɔ. Ama, nzen i wuraari fa nu na i kpɔɔɔri, ye i wura mbaa beberebe a. ²⁵ Sɔnɔ kere bo i koro i ŋɔɔ, i mi ba fun i, ama, sɔnɔ kere bo i koro ma i ŋɔɔ durunya n nu fen, i mi ba nya ŋɔɔ bo i la ma awieeri. ²⁶ Sɔnɔ kere bo i su m, wo yo daka ka i mi su m su, na deke bo m wo ni, m amusuisufɔ gusu wo do. Na sɔnɔ kere bo i suuri m, m Si Nyeme wura i mi kpiri.”

Kabo Yesu jɔjɔ fa kɔɔri i yiwee n jɔre su ni

²⁷ Na Yesu ase ka, “Kisa, m ahore asaaki, ye m se se wo? M koro se ka, m Si Nyeme, yi m fite ahin anyumboro bo i suba m do n nu, nzen se? Ai, m koro se ma so, dama nyini de ti ye m baari a. ²⁸ M de bo m se la ka, m Si, kere kabo u jirima woowa ti.” Na akonvi be atien afite angoro ase ka, “Ma du mo akere kabo m jirima woowa ti, na m kaaki kere i bekun.” ²⁹ Jama n bo bu jina Yesu bi n tiiri akonvi ni nga ni, na bu nbem ase ka, “Nzue akpura.” Na nbem gusu ase ka, “Nyeme merere ajɔɔ i do a.” ³⁰ Na Yesu ase bu ka, “Amberere de ti ye akonvi n jɔɔɔri a, ma mini de ti a. ³¹ Sanga n aju bo Nyeme di durunya n nufom jore, na i fon yi Sitana bo i ti bu fem ni. ³² Ama, mini, bu ba yeeri m su jinaari angoro baka jaanu n su, m cin sɔnɔ kere ba m

do.” ³³ Kabo i yo seeri so n kere yiwee n bo i bá wu i n wɔ.

³⁴ Na jama n ase i ka, “Ya ti i Nyeme Jɔɛ Kadasi n nu ka, Kristo Tiidefo ni wo bere sangga kere. I wú má. Ye i yoori se ye wɔɔ ɲa, wɔ yo daka ka bu bá yeeri Adamande Wa n su jinaari aɲgoro baka jaanu n su a? Ye Adamande Wa n la ɲma a?” ³⁵ Na Yesu ase bu ka, “Mini bo m ti wein ni, m wo am nu kisa, ama, m cé má. Nyini deɛ ti, am nya wo ni wein ni, am sunati wein nu wɔ, na má awosin tu am. Soɔ kere bo i wo awosin nu, i mi si má deke bo i sukɔ ni. ³⁶ Am nya wo ni wein ni, am yo i yarada, na m má am yo wein deɛ nbaam.” Yesu seeri so ni, na wɔ fite bu nu ako afie deke be, na má be ɲu i.

Kabo Yudafoɔm ayo má Yesu yarada ni

³⁷ Yesu yo yoori alekutura sam doɲgu na ba ɲu i, haari ni nyini mmɔɔ, ba yo má i yarada.

³⁸ Nyini ma Nyeme noaniɛ kanfo Esaya jɔɛ n bo i yo kereeri n yo yiiwa. I ɲa,

“M Nyeme Feme, ɲma ade jɔɛ n bo ya kan i n a?

Ye ɲma ye a yi u yiko akere i a?”

³⁹ Nyini deɛ ti, ye ba koro ayo má Yesu yarada n a. Kabo Esaya akaaki ase ka,

⁴⁰ “Nyeme ama ba yo anyinsinm na má bu ɲu asi,

na wɔ ma bu ahore ayo kekereke

na má bu ti i noaniɛ n bu,

adena má bu kaaki ba i do

na bu nya laifie.”

⁴¹ Esaya yo ɲuuri Yesu jirima woowa n deɛ ti, ye i kaanri i ɲu jɔɛ n a. ⁴² Yudafo nkpienkpienm

dɔŋgu mmɔɔ yoori Yesu yarada, ama, bu soroori Farasifɔm n ahore n dɛɛ ti, ba koro ayi má bu ɲu fofoe nu. Nzen bu yiiri bu ɲu ka ba yo i yarada, Farasifɔm ni fɔn bu fite bu tientienbunɔɔ sɔɔ n nu wɔ. ⁴³ Dama Yudafo nkpienkpienm n yo koroori adamande kansi taraari Nyeme dɛɛ.

Kabo Yesu seeri ka i nɔanie ni dí minem jɔre ni

⁴⁴ Na Yesu atien ase ka, “Sɔnɔ kere bo i yo m yarada, má mini ɲgumi ye i yo m yarada, ama, i yo bo wɔ sunma m n gusu yarada a. ⁴⁵ Na sɔnɔ kere bo i nie na i ɲuuri m, ti ka wɔ ɲu m Si Nyeme bo i sunmaari m n lɛɛ. ⁴⁶ Mini bo m ti wein n aba durunya n nu, adena sɔnɔ kere bo i yo m yarada, i wó má awosin nu. ⁴⁷ Sɔnɔ kere bo i ti m nɔanie n na i de má i, m di má i mi jɔre, dama ma ba má ka m ba di durunya n nufɔm jɔre wɔ, ama, m baari ka m ba de bu tii ji wɔ. ⁴⁸ Sɔnɔ kere bo i kete m, na i de má m nɔanie ni, i jɔredifo wo bere wɔ. Nɔanie n bo ma jɔjɔ i ni, yiri dí i mi jɔre jina cɛen n a. ⁴⁹ Dama má m koroyanu ye m kan sɔ a, ama, m Si n bo wɔ sunma m ni, yiri maari m nɔɔ, kereeri m nɔanie kun kun kere bo m jɔjɔ i n a. ⁵⁰ M si ka i nɔanie maawa n ti deke bo i ma ɲɔɔ bo i la má awieeri n wɔ. Nyini dɛɛ ti, kabo m Si seeri m ni, sɔ ye m jɔjɔ a.”

13

Kabo Yesu ɲmisiiri i susufɔm n jaa ni

¹ Alecin bo má bu di Butara cɛenkpiri n ni, na Yesu asi nu ka sanɲa n aju bo i fite durunya n nu

kaaki kɔ i Si Nyeme dɔ. Na i dɛɛ tienɔgu minem bo bu wo durunya n nu na i koro bu ni, i koro bu sɔ ɔ haari i kɔ ju i fanga nyaari. ² Na kɔngue sanga bo bu wo diire n di su ni, na Sitana awura Yudasi, Simon Isikariyoti wa n tii nu ka i tɔ Yesu ma i kpɔfɔm. ³ Na Yesu asi nu ka i Si Nyeme afa deke n kere awura i saa nu, na i kaaki si ka i fiteeri Nyeme dɔ baari a, na i káaki kɔ i dɔ ɔ. ⁴ Na wɔ nya yasu ajina, na wɔ yi i tanɔɛ n ase, na wɔ fa papawo abo i wi nu. ⁵ Na wɔ sa nzue ago nyanɔga nu, na wɔ bo i bu sunɔmisi i susufɔm n jaa, na wɔ fa papawo n bo i bo i wi nu ni sunuka bu jaam. ⁶ I ba kpuraari Simon Petoro, na wɔ bisa Yesu ka, “M Mibiɛ, na wɔrɔ ba nɔmisi m dɛɛ jaa?” ⁷ Na Yesu ase i ka, “Sa bo m suyo i ni, a koro ti má i bu kisa, ama, fa kɔ fa ba, a bá ti i bu.” ⁸ Na Petoro ase i ka, “Ai, a nɔmisi má m jaa haari durunya n ba yasu.” Na Yesu ase i ka, “Nzen ma nɔmisi má u jaa, m ni wɔrɔ akpaaki ɔɛ.” ⁹ Dɔ na Simon Petoro anya ase i ka, “M Mibiɛ, nzen i ti sɔ a, má a nɔmisi m jaa nɔgumi, ama, nɔmisi m saam ni m tii kere.” ¹⁰ Na Yesu ase i ka, “Sɔnɔ anya abie nzue, nka i nɔmisi i jaa a, i bie má nzue kun, dama i nɔunie kere ti casi wɔ. Amberɛ, am ti casi wɔ, ama, má am kere.” ¹¹ Yesu siiri bo i bá tɔ i ma i kpɔfɔm ni, nyini ti ye i nɔa má bu kere ti casi n a.

¹² I nɔmisi bu jaam wieeri ni, na wɔ fa i tanɔɛ n awura, na wɔ kɔ atana i tanaabiri ni. Na wɔ bisa bu ka, “Kabo ma yo am ni, am ati i bu?” ¹³ Am fere m ka am Kerefɔ ɔ, na am kaaki fere m ka am Mibiɛ. Am jɔjɔ nahɔre wɔ, dama m ti sɔ ɔ. ¹⁴ Tɔ. Kisa na mini bo m ti am Mibiɛ, ni am Kerefɔ,

na ma ηmisi am jaam ni, wɔ yo daka ka ambere gusu ηmisi am bengum jaam sɔ. ¹⁵ Dama ma yo akere am lɛɛ, na am gusu yo am bengum kabo ma yo am ni.” ¹⁶ Na wɔ se bu ka, “Nahɔre ye m suse am a, akɔ koro tara má i mibiɛ, na bekun sunmafo gusu koro tara má bo i sunmaari i ni. ¹⁷ Nzen am sin ahin n kere, na am yoori sɔ, terefie wo am dɔ.

¹⁸ M sujɔɔ ni má am kere wɔ, dama m si bo ma du mɔ ayi bu ni. Ama, kabo ba kere i Nyemɛ Jɔre Kadasi n nu ni, i ti ye ni ka i yo yiiwa, ka, ‘Sɔnɔ n bo m ni yiri sanɔa di diire taale kun nu, yiri akaaki m jaa tufɔ n a.’ ¹⁹ M suse am sa bo i bá yo wɔ lɛɛ, na i ba yoori, na am yo m yarada ka mini la sɔnɔhɔre n bo ma se am kabo m ti n a. ²⁰ Nahɔre ye m suse am a, sɔnɔ kere bo i de sɔnɔ bo m sunma i ni, i mi ade mini wɔ lɛɛ, na sɔnɔ kere bo i de mini, i mi ade yiri bo i sunmaari m wɔ lɛɛ.”

Kabo Yesu seeri ka Yudasi tɔ i ma i kpɔfɔm ni

²¹ Yesu seeri bu sɔ wieeri ni, na i ahore asaaki akɔ asin su, na wɔ se bu kpain ka, “Nahɔre ye m suse am a, am nu kun bá tɔ m ma m kpɔfɔm a.”

²² Na i susufɔm n abirisi, sunie bu ηnu nu, ama, ba si má bo i yó nyini sa n ni. ²³ Bu nu kun be bo Yesu koro i agaya n tana mata Yesu. ²⁴ Na Simon Peto abo i nyumbaa i dɔ ka i bisa Yesu ka, i ni ηma a? ²⁵ Na yiri n acin adodo Yesu, na wɔ bisa i ka, “Ya Mibiɛ, a ni ηma a?” ²⁶ Na Yesu ase i ka, “Sɔnɔ n bo m kpie too n bo toro n nu na m fá ma i ni, yiri lɛɛ.” Na wɔ fa too n abo toro n nu, na wɔ fa ama Yudasi, Simon Isikariyoti wa ni. ²⁷ Yesu faari too n maari Yudasi wieeri ni, na

Sitana awura i tii nu, na Yesu ase i ka, “Sa n bo a ɲa a yó i ni, kó yo i ndende.” ²⁸ Ama, bu kere bo bu woori diire n di su ni, bu be mmɔɔ asi má deke n bo i ti na Yesu seeri i sɔ ni. ²⁹ Yudasi tiiri bu ɲwaa bitafɔ n dɛɛ ti, bu nbem sunsun ka Yesu ɲa i kó to deke be na bu fa di cɛɛnkpiri n wɔ, wara i kó yi ɲwaa n be fa ma yaarifɔm wɔ. ³⁰ Yudasi diiri too n wieeri ni, na wɔ yasu afite ako. Nyini sanɲa ni, i ti kɔɲɔɲe wɔ.

Kabo Yesu maari bu nɔɔniɛ maawa fɔfɔre ni

³¹ Yudasi fite kó wieeri ni, na Yesu ase ka, “Kisa ye Nyeme wúra mini Adamande Wa n kpiri a, na m dɛɛ ti ye mine wúra m Si Nyeme kpiri a. ³² Na nzen bu wuraari Nyeme kpiri m dɛɛ ti, Nyeme gusu wúra m kpiri, na Nyeme má i yo kisa bere.” ³³ Na wɔ se bu ka, “M nbaam, m cé má am nu fen. Am bá nienie m busu fie wɔ, na kabo m yo seeri Yudafɔm ni, sɔ ye m suse am kisa, ka am koro kó má deke bo m sukɔ ni. ³⁴ Nɔɔniɛ maawa fɔfɔre ye m sufa ma am n a, yiri la ka, am koro am beɲɔm. Kabo ma koro am ni, am koro am beɲɔ sɔ. ³⁵ Nzen am koro am beɲɔ, nyini ye sɔnɔ kere si ka am ti m susufɔm a.”

Kabo Yesu seeri ka Petoro kéte kpe nsan ka i si má i ni

³⁶ Na Simon Petoro abisa i ka, “Ya Mibie, a kó ni wɔ?” Na Yesu abɔ i nu ka, “Deke bo m sukɔ ni, a koro su má m su kisa, ama, sanɲa suba bo a bá su m su.” ³⁷ Na Petoro akaaki abisa i ka, “Ya Mibie, nzu ti ye m koro su má u su kisa? Nzen i yo yiwee mmɔɔ a, m wú u dɛɛ ti.” ³⁸ Na Yesu abisa i ka, “A koro wu m dɛɛ ti? Nahɔre ye m

suse u a, kana akonyuma bá bo, a kéte kpe nsan su ka a si má m.”

14

Kabo Yesu na yiri ti atin n bo sonɔ koro fa i sukɔ Nyeme do ni

¹ Na Yesu ase i susufom n ka, “Má am ma am ahore saaki. Am yo Nyeme yarada, na am yo m gusu yarada. ² M Si Nyeme dika n nu, soom sunnu do, nzen má i ti má so, má m se má am. M kó na m kó sese woobiri su se am. ³ Na nzen m kó sese woobiri n su seeri am, m káaki ba fa am kó deke bo m kó wo ni, na deke bo m wó ni, am gusu wó do. ⁴ Na deke bo m sukɔ ni, am si atin ni.” ⁵ Na Tomasi ase i ka, “Ya Mibiε, ya si má deke bo a sukɔ ni, ye ya yo se si atin n a?” ⁶ Na Yesu ase i ka, “Mini ti atin n a, ni nahore, ni ngoo n a. Mini ngumi ti atin n bo sonɔ koro fa i na i kó m Si Nyeme do a. ⁷ Nzen má am siiri m, má am si m Si mmoo, ama, fa nyuma fa kó, am asi i, na am anu i.”

⁸ Na Filipu ase i ka, “Ya Mibiε, kere ya u Si ni, deke bo ya koro i kere lee.” ⁹ Na Yesu abisa i ka, “Filipu, bo m ni ambere awo bere ace so n na a si má m? Sonɔ kere bo wo nu mini anu m Si lee, ye nzu ti ye am na m kere am m Si n a? ¹⁰ A yo má yarada ka m ni m Si n ti deke kun wo, nzen se? Jore n bo ma joo ama am ni, má m tiengu jooowa, ama, m Si bo m ni yiri ti kun ni, yo i juma. ¹¹ Bo m na, m ni m Si n ti deke kun ni, am yo m yarada. Nzen má nyini, am yo m yarada sam bo m yo bu n dee ti. ¹² Nahore ye m suse am n a. Sonɔ kere bo i yo m yarada, yiri

mmɔɔ yó ahin sam bo m yo bu ni, na i yó bo bu tara ahin mmɔɔ, dama m sukɔ m Si dɔ ɔ. ¹³ Na deke kere bo am fa m дума fa sereeri i, m yó i ma am, adena mini Baa ni má minem wura m Si kpiri. ¹⁴ Na nzen am ba faari m дума fa sereeri m deke be, m yó i ma am.”

Kabo Yesu jɔjɔ fa kɔɔri Awiewie Casi n su ni

¹⁵ Na Yesu ase bu ka, “Nzen am koro m, am dé m nɔanie maawam ni. ¹⁶ M sére m Si Nyeme, na i má am Bukafɔ fɔfɔre bo i bá wo am dɔ sanɔa kere. ¹⁷ Yiri la Awiewie Casi n bo i se nahɔre ni. Durunya n nufɔm koro de má i, dama bu ɲu má i, na bekun bu kaaki si má i, ama, ambere si i, dama i wo am dɔ, na i bá wo am nu. ¹⁸ M kɔɔri, m yaki má am na am ka ayikam, m káaki ba am dɔ. ¹⁹ Wɔ ka kaan na durunya n nufɔm ɲu má m kun, ama, ambere ɲú m. M la ɲɔɔ n deɛ ti, am gusu nyá ɲɔɔ. ²⁰ Nyini cɛen n ye am sí ka mini ni m Si n ti deke kun a, na mini ni ambere gusu ti deke kun wɔ. ²¹ Sɔnɔ kere bo i de m nɔanie maawam, na i su i su, i mi ti bo i koro m a, na bo i koro m ni, m Si gusu koro yiri wɔ, na mini mmɔɔ kóro i mi, na m yí m ɲu kere i.”

²² Na Yudasi, má Yudasi Isikariyoti ni, ase ka, “Ya Mibie, nzu ti ye a yí u ɲu kere yere a, ye a yí má u ɲu kere má durunya n nufɔm a?” ²³ Na Yesu ase i ka, “Sɔnɔ kere bo i koro m, i dé m nɔanie ni, na m Si mmɔɔ kóro i mi, na ya bá, na ya bá wo i dɔ. ²⁴ Sɔnɔ kere bo i koro má m, i dé má m nɔanie ni. Nɔanie n bo ma jɔjɔ i ni, i ti má m deɛ nɔanie, i ti m Si n bo i sunmaari m deɛ wɔ.

²⁵ M toko wo am dɔ, ye m suse am ahin kere a, ²⁶ ama, m Si Nyeme súnma Bukafɔ ni, m дума

n nu, yiri la Awiewie Casi ni, yiri kére am deke kére a, na i káaki tenge am su fa kó deke kére bo ma kere am ni.”

²⁷ Na wó se bu ka, “Ahoreda n ye m sufa ma am n a. M dɛɛ ahoreda n ye m sufa ma am a. Má kabo durunya n nufóm ma am ahoreda ye m suma am n a. Má am ma am ahore saaki, má am soro sɛɛ. ²⁸ Am ati ka ma se ka, ‘M kó na m káaki ba am dɔ bekun.’ Nzen má am koro m, má am ahore jɔ ka m sukɔ m Si n dɔ, dama m Si tara m. ²⁹ Sa bo wó nya yo má lɛɛ, ye ma se am n a, adena i bá yoori, na am yo m yarada. ³⁰ M jójɔ má am dɔ jɔɛ beberebe kun, dama Sitana bo i ti durunya n nufóm tii ni suba. Ama, i koro yo má m pui. ³¹ M koro ka durunya n nufóm si ka, m koro m Si ni, nyini dɛɛ ti ye m yo deke kére bo i se m ka m yo i n a.”

Na wó se bu ka, “Am yasu na ya kó.”

15

Kabo Yesu ŋa yiri ti baka n ni i tii nahɔɛ su n a

¹ Na Yesu ase bu ka, “Mini ti baka n bo i su suuwa nahɔɛ su a, ye m Si Nyeme ti nyini baka n fie niefɔ. ² Asambaa kére bo i wo m su na i su má, m Si kpiɛ i ji wó, na asambaa kére bo i wo m su na i su, i kpiekpie i nyawa n yo i dɔŋgu wó, na i su nyunyumi. ³ Jɔɛ n bo m jójɔ maari am ni, yiri adu mɔ ayo am casi a. ⁴ Am wo ni mini na m gusu wo ni ambere. Kabo baka asambaa be wo má bere bo i koro su i ŋgumi, má ka i wo baka n su. Sɔ ye am gusu koro su má, má ka am wo m dɔ.

⁵ Mini ti baka n a, ye amberε ti asambaam ni, sɔnɔ kerε bo i wo m dɔ, na mini mmɔɔ wo i dɔ, i mi su suuwa nyunyumi wɔ, dama am koro yo má pui, má ka am awo m dɔ. ⁶ Sɔnɔ kerε bo i wo má m dɔ, bu kp̄ie i ji wɔ, kabo bu kp̄ie baka asambaa na i wu n wɔ, na bu tien bu nɔɔ wura sin nu na bu je ni. ⁷ Nzen am wo m dɔ, na m nɔanie n wo am ahore su, deke kerε bo am koroori i, na am sereeri Nyεmε, am nyá i. ⁸ Nzen am su suuwa nyunyumi, nyini kere ka am ti m susufɔm a, na i wura m Si kp̄iri. ⁹ Kabo m Si koro m ni, sɔ ye mini mmɔɔ koro am a, am wo ni m koro ni. ¹⁰ Ma de m Si nɔanie maawam n dεε ti ye i koro m a. Nzen am gusu de m nɔanie maawam ni, m gusu kóro am sɔ ɔ. ¹¹ Ma se am ahin sam na am ahore jɔ kabo m ahore ajo n wɔ, na am ahore jɔ n kɔ sin su. ¹² M nɔanie maawa n la ka o, am koro am beɲgu kabo m koro am ni. ¹³ Koro be wo má ahin koro n sin, ka sɔnɔ wu i danfom ti. ¹⁴ Nzen am su m nɔanie maawa n su, am ti m danfom wɔ lεε. ¹⁵ M fere am m danfom wɔ, m fere má am ka m akɔɔm kun, dama sɔnɔ akɔɔ si má i mibiε sayoowa kerε, ama, deke kerε bo ma ti i m Si dɔ ni, ma fa akere am. ¹⁶ Má amberε yiiri m a, ama, mini ayi am ase ka am kɔ su suuwa bo i wó bere sanɲa kerε, na deke kerε bo am bá fa m duma n sereeri m Si, i yó i ma am. ¹⁷ Nɔanie maawam n bo m sufa ma am la ka, am koro am beɲgum.”

Kabo Yesu ɲa durunya n nufɔm kpɔ i susufɔm ni

¹⁸ Na Yesu asa su ase bu ka, “Nzen durunya n nufɔm kpɔ am, am si nu ka o, ba du mɔ akpɔ mini wɔ, ye bu nya ba sukpɔ am n a. ¹⁹ Nzen

má am ti durunya n nufóm dɛɛ minem, má bu koro am kabo bu koro bu benggu n wɔ. Ama, bo ma yi am afite durunya n nufóm nu, na am ti má durunya n nufóm dɛɛ minem n ti, ye bu kpɔ am n a. ²⁰ Má am ma am wara fi ka ma se am ka, akɔɔ tara má i mibiɛ. Nzen bu yo kereeri m wuwuruwa, sɔ ye bu kére am gusu wuwuruwa a. Na nzen bu yo deeri m nɔaniɛ, bu dé am gusu dɛɛ ni. ²¹ Bu yó am nyini n kére, m dɛɛ ti, dama bu si má m Si bo i sunmaari m ni. ²² Nzen má ma ba akan má m ηu jɔre akere má bu, má bu si má ka ba yo satie, ama, kisa na ma kan akere bu ni, bu koro kan fite má nu ka ba yo má satie. ²³ Sɔnɔ kére bo i kpɔ m, i kpɔ mini ni m Si n kére wɔ lɛɛ. ²⁴ Ma yo alekutura sam bo ba ηu i. Be wo má bere bo i koro yo nyini alekutura sam sɔ. Nzen má ma yo má nyini alekutura sam na ba ηu má i, má be fa má bu ηgasi ka bu ti satieyofóm. Ama, kisa, ba ηu nyini n kére, na bu toko kpɔ m ni m Si ni. ²⁵ Nyini ma kabo ba kére i Nyeme Jɔre Kadasi n nu n ayo yiiwa n a, ka, 'Bu kpɔ m kpɔ ηgbɛɛn wɔ.'

²⁶ Na Bukafɔ n bo m súnma i fite m Si dɔ na i bá am dɔ ni, yiri ti Awiewie Casi n bo i kere kabo Nyeme ti nahɔre su n a, yiri dí m ηusu daani kere am a. ²⁷ Na am gusu di m daani, dama m ni amberɛ wo bere a, fite m juma n bumboori ba ju ni kisa.

16

¹ M suse am ahin sam kére bo bu bá yo n wɔ, na bu ba yoori, na má am kaaki am sin bo m.

² Bu bá fɔn yi am fite bu tientienbunɔɔ sɔɔm n

nu, ama, saɲga suba bo bu bá kun am, na bu súnsun ka bu susu Nyeme wo. ³ Bu si má m ni m Si n dɛɛ ti, ye bu yó nyini sam kere n a. ⁴ Ma se am sam bo bu bá yo lɛɛ, na i saɲga ba juuri, na am tɛɲge su ka m yo seeri am.”

Kabo Awiewie Casi n juma ti barasu ni

Na Yesu asa su ase bu ka, “M ni amɛɛɛ yo woori bumboori n dɛɛ ti, ye ma yo ase má am ahin kere a. ⁵ Ama, kisa m sukaaki ko yiri bo i sunmaari m n do ɔ, ye am be akoro abisa má m ka, ‘Ye a sukɔ ni wo?’ ⁶ Bo ma se ka m kó yaki am dɛɛ ti, am ahore asaaki agaya. ⁷ Ama, nahɔɛɛ ye m suse am n a, i ti am buka su wo ka m ko, dama nzen má m ko má, má Bukafɔ ni bá má, ama, nzen m kɔori, m súnma i am do. ⁸ I baari, i kéré durunya n nufɔm deke bo i ti satie, na i kéré bu deke bo i ti sakpa na i ko atin su Nyeme do, na i káaki kere bu kabo Nyeme bá di sɔno kere jɔɛ barasu. ⁹ I kéré bu deke bo i ti satie, dama bu yo má m yarada. ¹⁰ Na i kéré bu deke bo i ti kpa na i ko atin su Nyeme do, dama m sukɔ m Si n do ɔ, na am ɲú má m kun. ¹¹ Na i káaki kere bu kabo Nyeme bá di sɔno kere jɔɛ, dama Nyeme adi Sitana bo i ti durunya n nufɔm kere tii n jɔɛ ayo i ɲgbeɛn.

¹² M toko la jɔɛ doɲgu bo má m se am, ama, am koro de má i kere kisa. ¹³ Ama, Awiewie Casi n bo i se nahɔɛɛ n ba baari, yiri kéré am nahɔɛɛ atin kere a, dama jɔɛ kere bo i kán kere am ni, má i dɛɛ yiko nu ye i fá kan, ama, kabo Nyeme kéré i ni, so ye i kán, na i kéré am sam bo bu bá yo ni. ¹⁴ Yiri wúra m kpiri a, dama i kán m ɲu

jɔrɛ kere am. ¹⁵ Deke kɛrɛ bo i ti m Si dɛɛ, i ti m dɛɛ wɔ, nyini dɛɛ ti ye ma se am ka, i kán m ɲu jɔrɛ kere am n a.”

Kabo Yesu kaanri ahoresaaki ni ahorejɔ jɔrɛ ni

¹⁶ Na Yesu ase bu ka, “Wɔ ka kaan na am ɲú má m, ama, i ba yoori kaan buka su na am ɲú m bekun.” ¹⁷ Na i susufɔm n nbem abisa bu ɲuɲu nu ka, “Nzu jɔrɛ ye i jɔjɔri i sɔ n a? I ɲa, wɔ ka kaan na ya ɲú má i, ama, i ba yoori kaan buka su, ya ɲú i bekun. Ye wɔ kaaki ase bekun ka, i sukɔ i Si dɔ ɔ.”

¹⁸ Na ba kaaki abisa bu ɲuɲu nu ka, “Ye ahin dɛɛ, i ba yoori kaan n bu la ka se wɔ lɛɛ? Ya si má i jɔjɔwa n bu.”

¹⁹ Na Yesu afa nu ka bu koro ka bu bisa i nyini jɔjɔwa n bu wɔ. Na wɔ bisa bu ka, “Bo m seeri ka wɔ ka kaan na am ɲú má m, ama, i ba yoori kaan buka su, am ɲú m bekun n ye am subisa am ɲuɲu nu, na am si i bu, nzen se?”

²⁰ Nahɔrɛ ye m suse am a, amberɛ bá sun na am kóko, ama, na durunya n nufɔm berɛ ahore jó. Amberɛ ahore bá saaki, ama, am ahoresaaki ni bá kaaki ahorejɔ. ²¹ Nzen bara anya akutu ka i wu baa, i la ahoresaaki, dama i wahara sanɲa ye wɔ ju a, ama, i ba wuuri baa n wieeri, i tɛnge má i wahara n bo wɔ sin n su kun, dama baa n bo wɔ wu i durunya n nu n ti, i ahore ajɔ. ²² I ti sɔ ɔ, am gusu dɔ, kisa, am la ahoresaaki, ama, m bá ɲu am bekun, na am ahore jó bo sɔnɔ koro dé má am ahorejɔ n am dɔ. ²³ Nyini cɛɛn ni, am bísá má deke be busu m dɔ. Nahɔrɛ ye m suse am a, deke kɛrɛ bo am sereeri m Si ni, m duma

n nu, i yó i ma am. ²⁴ Am nya sere má m Si deke be m дума n nu haari ni nyuma. Kisa am sere i, na am nyá i, na am ahore jó kó sin su.”

Kabo Yesu akunma durunya n ni

²⁵ Na Yesu ase bu ka, “Ma se am ahin n kere anyunderere nu wo lee, sanja suba bo m bó má am anyunderere kun, ama, m kán m Si nu jore kere kpain kere am a. ²⁶ Nyini cee n ni, am fá m дума n fa sere Nyeme, má mini sere Nyeme ma am a. ²⁷ Yiri m Si ni i tii koro am a, dama am koro m na am ayo yarada ka m fite i do o. ²⁸ M fiteeri m Si do o baari durunya n nu a, ye kisa m sufite durunya n nu kaaki kó i do a.”

²⁹ Na Yesu susufom n ase i ka, “Kisa a joro ya do weinwein wo, a bo má ya anyunderere kun. ³⁰ Ama, kisa ya si ka a si deke kere, wo ti má ye ni ka be bisa u deke be, dama kana bu ba bisa u deke be, a si kabo bu koro ka bu bisa u ni, nyini ma ya si ka a fite Nyeme do n a.”

³¹ Na wo bisa bu ka, “Am ayo yarada kisa? ³² Ama, sanja suba bo wo ju awie, bo am kere bá sandi yaki mini ngumi, na sono kere kó i dika, ama, m wo má m ngumi, dama m Si Nyeme wo m do. ³³ Ma se am ahin kere na am la ahoreda m do. Am nu kekereke durunya n nu, ama, am fa ahoresi, dama ma kunma durunya ni.”

17

Kabo Yesu sereeri Nyeme maari i susufom n ni

¹ Yesu seeri so wieeri ni, na wo ye i tii su anie angoro na wo sere Nyeme. I na, “M Si, sanja n aju. Wura mini u Wa n kpiri, adena m gusu wura

u kpiri. ² Dama a ma m yiko ka m nie minem kere su, na bo a fa bu ama m ni, m má bu ηgɔɔ bo i la má awieeri. ³ Wɔrɔ ηgumi ti Nyeme nahɔre su a. Na mine bo bu si u, na bu si mini Yesu Kristo n bo a sunmaari m ni, bere la ηgɔɔ bo i la má awieeri n a. ⁴ Ma wura u kpiri durunya n nu, dama ma yo juma n bo a ma m ka m yo i n awie. ⁵ M Si, sanɔa bo durunya nya bo má i bu ni, m yo woori u dɔ ɔ, ye a wura m kpiri a. Kisa, kaaki wura m kpiri u dɔ bekun.

⁶ Minem n bo a yiiri bu fiteeri durunya n nu fen, ma kere bu kabo a ti barasu. Bu tiiri u dɛem wɔ, ye a faari bu maari m a, ye ba de u nɔaniɛ n a. ⁷ Kisa bu si ka deke kere bo a fa ama m ni, fite u dɔ ɔ. ⁸ Dama nɔaniɛ n kere bo a jɔjɔ fa maari m ni, m gusu ajɔjɔ ama bu, ye ba de i, ye ba si ka i ti nahɔre ka m fiteeri u dɔ ɔ, ye ba yo yarada ka wɔrɔ sunmaari m a. ⁹ M susere u ma bere wɔ, má bo bu wo durunya n nu ni, ama, minem bo a fa bu ama m ni, bere ye m sere u ma bu a, dama bu ti u dɛɛ minem wɔ. ¹⁰ M minem kere ti u dɛem wɔ, ye u dɛem gusu kere ti m dɛem, ye ba ma minem anu m jirima woowa ni. ¹¹ Kisa, m suba u dɔ lee, m ká má durunya n nu fen kun, ama, bere ká fen wɔ. M Si, wɔrɔ bo a ti casi ni, yo bu kanda u duma n bo a fa maari m n yiko nu, na bu yo deke kun, kabo mini ni wɔrɔ ti kun ni. ¹² Sanɔa bo m woori bu dɔ ni, m yoori bu kanda u duma n bo afa ama m yiko nu wɔ. M nieeri bu su, na bu be aka má ηgbɛen, má ka bo wɔ ka ηgbɛen haari i ni kunnu ni, adena kabo ba kere i Nyeme Jɔre Kadasi n nu n yo yiiwa.

¹³ Kisa m suba u dɔ lee, ama, m toko wo

durunya n nu ye m jɔjɔ ahin jɔjɔowa n na bu nya m dɛɛ ahorejɔ n kɔ sin su. ¹⁴ Ma fa u nɔanie n afa ama bu, na kabo m ti má durunya n nu fen fɔ be ni, sɔ ye bu gusu ti má durunya n nu fen fɔm a, nyini dɛɛ ti, durunya n nufɔm koro má bu jɔrɛ. ¹⁵ M susere má u ka a yi bu fite durunya n nu wɔ, ama, m susere u ka a kanda Sitana satieyofɔ ni, na i yaki bu. ¹⁶ Kabo m ti má durunya n nu fen fɔ ni, sɔ ye bu gusu ti má durunya n nu fen fɔm a. ¹⁷ U nɔanie n ti nahɔrɛ wɔ. Ma u nɔanie n bo i ti nahɔrɛ n yo bu casi. ¹⁸ Kabo a sunmaari m durunya n nu ni, sɔ ye m gusu asunma bu a. ¹⁹ Bere dɛɛ ti, ye ma fa m ɲu ama u a, adena bere gusu fa bu ɲu ma u nahɔrɛ n dɛɛ ti.

²⁰ M susere má u ma má bere ɲgumi wɔ, ama, m susere u ma minɛm bo bu bá yo m yarada ahinm dɛɛ nɔanie kaanwa n ti wɔ. ²¹ M Si, m sere u ka a ma bu kere yo kun, kabo a wo m dɔ, na m gusu wo u dɔ ni, ma bere gusu wo ya dɔ, adena durunya n nufɔm yo yarada ka wɔrɔ sunmaari m a. ²² U jirima woowa n bo a maari m ni, ma fa ama bu, na bu yó kun kabo m ni wɔrɔ ti kun ni. ²³ M wo bu dɔ, na u gusu wo m dɔ, nyini ma bu yo deke kun kabo a koro ka bu ti n a, na durunya n nufɔm si ka wɔrɔ sunmaari m a, na kabo a koro m ni, a koro u minɛm gusu sɔ sɔ.

²⁴ M Si, m koro ka a ma minɛm bo a fa bu ama m n bá wo m dɔ, deke bo m wo ni, na bu ɲú m jirima woowa n bo a fa maari m ni, dama sanja bo a nya ayi má durunya n ye a koro m a. ²⁵ M Si, wɔrɔ yo sa kere bo i kɔ atin su n a, durunya n nufɔm si má u, ama, mini si u, na ahinm gusu

si ka wɔɔ sunmaari m a. ²⁶ Ma kere bu kabo a ti barasu, na m toko sukere bu wɔ, adena koro n bo a koro m n wó bu nu, na m ni bere yó kun.”

18

Kabo bu kɔɔri ka bu kɔ tara Yesu ni

¹ Yesu sereeri Nyeme wieeri ni, na i ni i susufɔm n ayasu akɔ akpɛ Kɛdɔɔn nzuetin n buekun dɔ, deke bo baka fie be wo ni, na ba kɔ awura baka fie n nu. ² Yudasi bo i suto Yesu ma i kpɔfɔm ni si dika n nu, dama Yesu ni i susufɔm nati tien bu nɔɔ dɔ ɔ sanɔa sanɔa. ³ Na Yudasi aba dɔ. Sojam su i su, ni tintinijinafɔm bo Nyeme sayoowa dɔnguyofɔm nkpienkpienm n ni Farasifɔm asunma bu n buka su. Bu bita fitanam, ni wura sinm, ni biɛɔya nenɔem. ⁴ Yesu si sa kere bo i bá tu i ni, na wɔ kpa bu atin abisa bu ka, “Am koro nɔma a?” ⁵ Na ba bɔ i nu ase i ka, “Ya koro Yesu Nazaretifo n wɔ.” Na wɔ se bu ka, “Yiri la mini.” Yudasi bo i tɔɔri i ni jina sojam n nu. ⁶ Yesu seeri ka, “Yiri la mini” ni, na bu kere akɔkɔ bu sin akpakpaasi asiɛngu. ⁷ Na wɔ kaaki abisa bu bekun ka, “Am koro nɔma a?” Na ba se i ka, “Ya koro Yesu Nazaretifo n wɔ.” ⁸ Na wɔ se bu ka, “Ma se am ka yiri la mini. Nzen am koro mini wɔ, am ma ahin minem bere kɔ.” ⁹ I seeri sɔ ni, na i nɔanie bo i yo jɔjɔri i n ayo yiiwa, ka, “Minem bo a fa bu ama m ni, m ma má bu be ka má nɔbɛn.” ¹⁰ Nyini sanɔa Simon Petoro jina bita takobe, na wɔ cin awɔɔ i akpɛ sɔnɔ be sui, i saa fɔmbɔɔ dɛɛ ni, nyini sɔnɔ n ti Nyeme sayoowa dɔnguyofɔm kpɛn n akɔɔ ɔ. Bu fere i ka Malikusi. ¹¹ Na Yesu ase Petoro ka,

“Fa u takobe n wura i buε nu. A ηa má m ηu anyumboro n bo m Si afa ama m n wɔ?”

Kabo bu taraari Yesu kɔɔri bu kpien Anasi dɔ ni

¹² Na sojam, ni bu kpien, ni Yudafɔm nkpien-kpienm n tintinijinafɔm n atara Yesu acici i nyama. ¹³ Bu du mɔ faari i kɔɔri sɔnɔ be bo bu fere i ka Anasi n dɔ ɔ ka. Anasi sibiε la Kayafasi. Kayafasi ti Nyεmε sayoowa dɔnguyofɔm kpien n nyini afɔ n a. ¹⁴ Yiri Kayafasi ti bo i yo seeri Yudafɔm ka i ti ye ni ka sɔnɔ kun wu ma minem kεε n a.

Kabo Petoro keteeri ka i si má Yesu ni

¹⁵ Bu taraari Yesu sukɔ ni, na Simon Petoro ni Yesu susufɔ n kun asu i su akɔ. Nyεmε sayoowa dɔnguyofɔm kpien n si nyini Yesu susufɔ n dεε ti, ye i suuri Yesu su wuraari yiri Nyεmε sayoowa dɔnguyofɔm kpien n gisan nu a. ¹⁶ Ama, na Petoro yiri aka ajina dasin anɔ n nu, na yiri susufɔ n bo Nyεmε sayoowa dɔnguyofɔm kpien n si i ni afite, na wɔ ba afani n bo i jina kanda anɔ n dɔ, na wɔ sere i atin na wɔ fa Petoro awura. ¹⁷ Na afani n bo i jina kanda anɔ n abisa Petoro ka, “Wɔrɔ mmɔɔ ti nyini sɔnɔ n susufɔm nu kun wɔ, má sɔ?” Na Petoro ase i ka, “Ai, m ti má bu kun.”

¹⁸ Ayere sanɓa lεε, na Nyεmε sayoowa dɔnguyofɔm kpien ni ngbefenem, ni tintinijinafɔm atɔrɔ sin wo tun su, na Petoro gusu ajina bu bi sutun sin n be.

Kabo Nyεmε sayoowa dɔnguyofɔm n kpien n diiri Yesu jɔrε ni

19 Na Nyeme sayoowa donɗguyofom n kpien n abisa Yesu fa ko i susufom n jore, ni kabo i kereewa n ti barasu ni. 20 Na Yesu ase i ka, “Sanga kere m jɔɔ sɔɔ kere nyunu wɔ, na m kere bu Nyeme noanie ni bu tientienbunɔɔ soom n nu, ni Nyeme Sereebiri Awuru n nu, deke bo Yudaɓom kere tien bu nɔɔ ni, m kan má jore be fiɛwa nu. 21 Ye nzu ti ye a bisa m a? Bisa minem bo bu tiiri m kereewa n ka m seeri bu se wɔ. Bere si kabo m seeri bu n a.” 22 Yesu seeri so ni, na tintinijinafo n bo i jina dodo i n abo i nyɔɔnu, na wɔ bisa Yesu ka, “So ye a bo Nyeme sayoowa donɗguyofom kpien n nu a?” 23 Na Yesu ase i ka, “Nzen ma jɔɔ jore bo wɔ ko má atin su, kan na m ti. Ye nzen bo ma se n ti nahore, nzu ti ye a bo m nyɔɔnu a?” 24 Na Anasi ama ba fa i ni nyama ciciiwa n so ako Kayafasi bo i ti Nyeme sayoowa donɗguyofom n kpien n do.

Kabo Peto ro keteeri be kun ka i si má Yesu ni

25 Simon Peto ro jina woori sin n tun su ni, na ba bisa i ka, “Woro mmɔɔ ti i susufom kun wɔ, má so?” Na Peto ro akete, i na, “Ai, m ti má bu kun.” 26 Na Nyeme sayoowa donɗguyofom kpien n akɔ be, i dikafɔ la sɔɔ n bo Peto ro kpie yiiri i sui ni, na wɔ se Peto ro ka, “Ma nu má u ka a wo i bi baka fie n nu do?” 27 Na Peto ro akete be kun, kpen ga akonyuma abo.

Kabo bu faari Yesu baari Gomina Pilato do ni

28 Na alecin ngarama fun na ba fa Yesu afite Kayafasi dika n nu, na ba fa i ako gomina n dika, bu fere gomina n ka Pilato. Yudaɓom awura má gisan nu, adena má bu yo bu nu fin, na bu koro

di má Butara cɛɛnkpiri ni. ²⁹ Nyini ti, na Pilato afite aba bu dɔ dasin abisa bu ka, “Ahin sɔɔ n bo am afa i aba m dɔ ni, i ɲgasi la bɔɔ?” ³⁰ Na ba se i ka, “Nzen má wɔ do má ɲgasi be, má ya fa má i ba má u dɔ.” ³¹ Na Pilato ase bu ka, “Amberɛ mmɔɔ ni am tii fa i kɔ di i jɔɛ kabo am jɔɛdi atin kere ni.” Na Yudaɔm n ase i ka, “Ya la má atin bo ya kun sɔɔ.” ³² Bu seeri sɔ ni, adena Yesu nɔaniɛ n bo i seeri kabo i bá wu barasu n yo yiiwa.

³³ Na Pilato akaaki awura gisan n nu, na wɔ fere Yesu abisa i ka, “Wɔɔ ti Yudaɔm Fɛmɛ n a?” ³⁴ Na Yesu abisa i ka, “U dɛɛ sunsunni nu lɛɛ, nzen be seeri u a?” ³⁵ Na Pilato abisa i ka, “M ti Yudaɔ ɔ? U minɛm ni Nyemɛ sayoowa dɔɲguyɔfɔm nkpienkpienm ni faari u baari m dɔ a. A do nzu ɲgasi wɔ?” ³⁶ Na Yesu ase i ka, “M femɛya n ti má durunya n nu fɛn femɛya. Nzen má m femɛya n ti durunya n nu fɛn femɛya, má m susufɔm bá kun luɛ m busu, na má be koro tara má m wura má Yudaɔm saa nu. Ama, m femɛya n ti má durunya n nu fɛn dɛɛ.” ³⁷ Na Pilato abisa i bekun ka, “Nka a ti fɛmɛ wɔ lɛɛ?” Na Yesu ase i ka, “Bo a ɲa m ti fɛmɛ ni, i ti sɔ ɔ. Bu wuuri m durunya n nu ka m ba di nahɔɛ n daani wɔ. Na sɔɔ kɛɛ bo i su nahɔɛ n su, i de m nɔaniɛ n wɔ.” ³⁸ Na Pilato abisa i ka, “Nahɔɛ la nzu wɔ?”

Kabo bu maari nɔɔ ka bu kun Yesu ni

Pilato seeri i sɔ, na wɔ kaaki afite akɔ Yudaɔm dɔ akɔ ase bu ka, “Ma ɲu má i ɲgasi be wɔ do i. ³⁹ Ama, am la am yoowa be bo i ma m atin ka m yi dansaraka kun ma am Butara cɛɛnkpiri n di

sangá. Am koro ka m yi amberε Yudafom Feme ni ji ma am a, nzen se?" ⁴⁰ Na ba tien ase ka, "Má yiri. Ya koro Barabasi wɔ." Barabasi ti sɔnɔ bo i nati fin minem di wɔ.

19

¹ Na Pilato ama ba fa Yesu akɔ afin i ngbere. ² Na sojam n awura i tanlεε kɔkɔre yorom ka femeya dεε su, na ba fa buwe aɲɔ i ka kaba dεε su, na ba fa aforo i tii. ³ Na bu suba i dɔ suyo i anzasi se i ka, "Yudafom Feme, ya yo u anse." Na ba bo i nyɔɔnu. ⁴ Na Pilato akaaki afite aba Yudafom dɔ aba ase bu ka, "Am ti fen, m sufa i fite ba kere am wɔ, na am si ka ma ɲu má ngasi bo wɔ do i." ⁵ Yesu tie fiteeri ni tanlεε kɔkɔre yorom ni, ni i tii buwe kaba n ni, na Pilato ase bu ka, "Am niε, sɔnɔ n yaa." ⁶ Deke bo i tie fiteeri na Nyeme sayoowa dɔnguyofom nkpienkpienm ni tintinijinafom ɲuuri i sɔ ni, kpenɲa na ba tien, bu ɲa, "Am kpama i baka jaanu n su na i wu. Am kpama i." Na Pilato ase bu ka, "Amberε mmɔɔ ni am tii fa i kɔ kpama i e. Mini, ma ɲu má ngasi bo wɔ do i." ⁷ Na ba se i ka, "Ya la nɔaniε kpamaawa be, wɔ yo daka ka i wu, dama i ɲa i ti Nyeme Wa a."

⁸ Pilato tiiri ka Yesu ɲa i ti Nyeme wa ni, na sere ati i abuka su. ⁹ Na wɔ kaaki awura gisan n nu abisa Yesu ka, "A fite ni wɔ?" Ama, Yesu abɔ má i nu. ¹⁰ Na Pilato akaaki abisa i ka, "A bɔ má m nu? A si má ka m la yiko bo m koro ma bu fa u ji, na m kaaki la yiko bo m koro ma bu kpama u baka jaanu n su?" ¹¹ Na Yesu ase i ka, "Nzen má Nyeme ama má u atin, maala má yiko bo a koro

yo m pui. Nyini ti, sɔnɔ n bo i faari m wuraari u saa nu ni, i satie yoowa tara u dɛɛ.” ¹² I seeri sɔ ni, na Pilato akpi kabo i yo na i yaki Yesu nu ji. Ama, na Yudafoɔm sutientien suse ka, “Nzen a yakiiri i nu jiiri, u ni Feme Siza danfoya awie lee, dama sɔnɔ kere bo i yo i nu ka i ti feme, i mi ti Feme Siza kpɔfo ɔ.”

¹³ Pilato tiiri sɔ ni, na wo fa Yesu afite, na wo tana jore diibiri n su bimbini n su. Yudafoɔm anie nu bu fere i ka *Gabata*, i bu la ka, deke bo ba fa yabue asese su ayo i dɔngɔ ni. ¹⁴ Nyini cɛen n tiiri bu Butara cɛenkpiri n kpokpo cɛen wo, wiesu kerefi buru ni nnyo sanga a. Na Pilato ase Yudafoɔm ka, “Am feme n yaa.” ¹⁵ Na ba kaaki atien ase ka, “Am fa i ko, am fa i ko kpama i baka jaanu n su.” Na Pilato abisa bu ka, “M fa am feme n ko kpama i baka jaanu n su?” Na Nyeme sayoowa dɔnguyofom nkpienkpienm n ase ka, “Ya la ma feme be sin Feme Siza nu.” ¹⁶ Bu seeri sɔ wieeri ni, na Pilato anya afa i ama bu ka bu ko kpama i baka jaanu n su.

Kabo bu kpamaari Yesu baka jaanu n su ni

Na ba de Yesu ako. ¹⁷ Na yiri ni i tii aso i baka jaanu n ako awore n bo bu fere i ka Tereawa Woobiri ni, Yudafoɔm anie nu bu fere do ka *Gologota*. ¹⁸ Na ba kpama i baka jaanu n su do, na ba kaaki akpama mine nnyo nbem adodo i, bu kpamaari kun i saa fomboro su, na ba kpama kun i saa bie su, na Yesu awo bu afien. ¹⁹ Na Pilato akere kerewa be amata i tii su baka jaanu n su. Kerewa n la ka, “Yesu Nazaretifo n bo i ti Yudafoɔm Feme n lee.” ²⁰ Bu kereri nyini

kerεεwa n Yudafɔm, ni Romafɔm, ni Girikifɔm dεε aniem kerε nu wɔ, na Yudafɔm dɔŋgu aŋu i, na ba kan i, dama deke bo bu kpamaari i n waari má ni miε kunnu. ²¹ Na Nyεmε sayoowa dɔŋguyofɔm nkpienkpienm n akete ase Pilato ka, “Má a kerε ka, ‘Yudafɔm Fεmε n lεε,’ ama, kerε ka, ‘Ahin sɔnɔ ŋa, “Mini ti Yudafɔm Fεmε n a.” ’ ” ²² Na Pilato ase bu ka, “Bo ma kerε i ni, nyini lεε wɔ.”

²³ Sojam n kpamaari i baka jaanu n su wieeri ni, na ba kpaaki i nenje wuraawam nu busu nna, na bu kerε afa kun kun, na wɔ ka i tanlεε yorom bo i wo i bu na i wura be gɔ su ni, i la má gise kpaabiri, ama, ba wu i kerε angoro kɔ jura asiεŋgu wɔ. ²⁴ Na ba se ka, “Má am ma ya sonsɔn i nu, ama, am ma ya tu mbaa na ya si bo i dí i.” Bu yoori sɔ adena Nyεmε Jɔrε Kadasi n yo yiiwa, bo ba kerε i ka,

“Ba kpaaki m nenje wuraawam nu,
na ba tu mbaa m tanlεε n bo i wo m bu n
busu ni.”

Nyini ti ye sojam yoori sɔ n a.

²⁵ Na Yesu ni, ni Yesu ni niεmabara, ni Kolopasi yi Mariya, fa kɔ tuuri Mariya n bo i fite Magadala n jina dodo deke bo bu kpamaari Yesu ni. ²⁶ Yesu niε ŋuuri i ni ni, ni i susufɔ n bo i koro i agaya n ka bu jina dodo i ni, na wɔ se i ni n ka, “M ni, niε fεn, u wa la ahin.” ²⁷ Na wɔ se i susufɔ n gusu ka, “Niε fεn, u gusu ni lεε.” Nyini cεen n kerε na Yesu susufɔ n afa Yesu ni, na wɔ kɔ awo i dɔ.

Kabo Yesu wuuri ni

²⁸ Nyini sin na Yesu asi nu ka wɔ yo i juma kerε awie, na wɔ se ka, “Nzuehɔε ti m wɔ.” I

seeri sɔ ni, adena Nyeme noanie n yo yiiwa. ²⁹ Nyini sanɔa dundu be taka bere, wɔ yi ni nzan gagaraki, na ba fa mene afa awɔ baka su afa abo nu alaandi ato i nɔɔ. ³⁰ Yesu de nu wieeri ni, na wɔ se ka, “Wɔ wie.” Na wɔ biri i tii, na wɔ yo Nyeme deɛ.

Kabo bu wɔɔri Yesu kpɛ i nvin nu ni

³¹ Nyini cɛɛn n ti Njumiyi cɛɛn n kpokpo cɛɛn n ti, ba koro má ka minem bo ba kpama bu baka jaanu n su n ka sense su bu Njumiyi cɛɛn ni, dama Njumiyi cɛɛn n bo i suba n ti cɛɛnkpɛri bambaka bu dɔɔ. Nyini deɛ ti, ye bu sereeri Pilato ka i ma bu kɔ bubu bo ba kpama bu baka jaanu n su jaam n a, na bu yi bu kɔ se bu. ³² Nyini ti, na sojam n akɔ abo abubu sɔnɔ n kun jaam, ni nyiŋga n gusu deɛ, bere n bo bu kpamaari bu dodoori Yesu ni. ³³ Ama, sanɔa bo bu ba kpuraari Yesu ni, bu ŋuuri ka yiri awu, nyini deɛ ti, ba bubu má i jaam. ³⁴ Ama, na sojam kun afa kpɛ awɔ Yesu nvin nu, kpenɔa na nzue ni mbunja susonɔgi fite. ³⁵ Sɔnɔ n bo i nyumbaa ŋuuri i ni, yiri di i daani a, adena am yo yarada. I jɔre n ti nahɔre wɔ, na kabo i di daani n gusu ti nahɔre wɔ. ³⁶ Ahin n kere yoori, adena kabo ba kere i Nyeme Jɔre Kadasi n nu n yo yiiwa. Ba kere ka, “I buwe kun n kpein mmɔɔ bu má.” ³⁷ Ye ba kaaki akere ka, “Minem bá nie yiri n bo ba wɔ i kpɛ n wɔ.”

Kabo bu seeri Yesu ni

³⁸ Nyini deɛ sin, na sɔnɔ be bo bu fere i ka Yosefu n asere Pilato atin na i yi Yesu ŋunie n kɔ se i. Na Pilato ama i atin, na wɔ kɔ ayi i ŋunie n

baka jaanu n su ako. Yiri Yosefu fite mie kpiri n bo bu fere i ka Aramatiya n su wo, i yo tiiri Yesu susufom kun wo, ama, i soroori Yudafom ahore ti, wo yi ma i nu fofoe nu. ³⁹ Na Nikodemo bo i yo baari Yesu do kongue be n gusu aba, i bita nguin nvanvani ni tulaalee sanggaawa, i nonoori ju pobu aburana. ⁴⁰ Na ba fa Yesu njunie ni, na ba yo i kabo Yudafom yo bu fuin na bu se i ni, bu faari tulaalee n goori i nu wo, na ba nya afa nzee apooni i. ⁴¹ Deke bo bu kpamaari Yesu ni, baka fie be wo do. Nyini baka fie n nu yabue bue bo ba lokoti i ayo i fanjunma wo do, bo bu nya se ma fuin nu ni. ⁴² Nyini ceen n ti Numiyi ceen n kpokpo n dee ti, na bekun, fanjunma n waari ma ni bere ni, ye bu faari i ko seeri nu n a.

20

Kabo Yesu tengeeri i yiwee n nu ni

¹ Yudafom bakue n bumboori, mone ceen ngarama fuun, nyini sangga dika toko ti liim, na Mariya n bo i fite Magadala n ako yabue bue fanjunma n su. I ko juuri ni, i nuuri ka ba yi yabue bambaka n bo bu fa toori fanjunma n ano ni. ² Na wo njmati ako Simon Petoro ni Yesu susufo n bo i koro i agaya n do, na wo se bu ka, "Ba yi Mibie n fanjunma n nu, ya si ma deke bo ba fa i ako ase." ³ Na Petoro ni i lamoko n ayasu ka bu ko fanjunma n su. ⁴ Bu mine nnyo ni sunjmati ko a, ama, na kun n anjmati asin Petoro nu adu mo aju fanjunma n su. ⁵ Na wo kasi anie fanjunma n nu, anu ka nzee n da, ama, wo wura ma fanjunma n nu. ⁶ Ama, na Simon Petoro yiri

aka sin aba aju, na wɔ wura faɲkunma n nu, aɲu ka nzee n da, ⁷ na wɔ ɲu ka tani n bo bu fa ciinri Yesu tii ka kaba n gusu bubu nu da i ɲgumi. ⁸ Nyini saɲga na yiri n bo i du mɔ juuri faɲkunma n su n awura nu, i ɲuuri i ni, na wɔ yo yarada kabo Yesu yo seeri bu ni. ⁹ Ama, ba nya asi má Nyeme Jore Kadasi n bo i ɲa Yesu tɛɲge i yiwee n nu n bu. ¹⁰ Na ba kaaki ako awuru.

Kabo Yesu yiiri i ɲu kereeri Mariya n bo i fite Magadala ni

¹¹ Ama, na Mariya aka ajina faɲkunma n su, na i susun. I wo sun su ni, na wɔ kasi anie faɲkunma n nu. ¹² Na wɔ ɲu merɛkem nnyɔ ka bu wura tanɛɛ fofoe tana deke bo bu faari Yesu ɲunie n daari ni, kun tana deke bo bu faari i tii wɔori ni, na nyiɲga gusu tana deke bo bu faari i jaa wɔori ni. ¹³ Na ba bisa i ka, “Bara, nzu ti ye a sun a?” Na wɔ se bu ka, “Ba yi m Mibie n wɔ, ye m si má deke bo ba fa i ase.” ¹⁴ I seeri sɔ ni, na wɔ kaaki anie i sin. I ɲuuri ka Yesu jina, ama, wɔ si má ka Yesu lɛɛ. ¹⁵ Na Yesu abisa i ka, “Bara, nzu ti ye a sun a? A koro ɲma a?” Mariya ɲuuri i sɔ ni, i sunsun ka fie n niefo a. Na wɔ se i ka, “M jakpien, nzen wɔɔ ayi i ako ase deke be a, kere m na m kɔ fa i.” ¹⁶ Na Yesu afere i ka, “Mariya.” Na wɔ kaaki anie Yesu dɔ, na wɔ se i ka, “*Raboni.*” Yudafom dɛɛ anie n nu, i bu la ka, ya Kerefo. ¹⁷ Na Yesu ase i ka, “Má a fa u saa kan m, dama ma nya ako má m Si dɔ, ama, kɔ na a kɔ se m ninbaam n ka, ‘M sukɔ m Si bo i ti am Si ni, ni m Nyeme bo i ti amɛɛ mmɔɔ Nyeme n dɔ.’ ” ¹⁸ Na Mariya n bo i fite Magadala n ako

ase bu ka, “Ma ηu Mibiε ni.” Na wɔ se bu jɔrε n kεrε bo Yesu akan akere i ni.

Kabo Yesu yiiri i ηu kereeri i susufɔm ni

¹⁹ Na bakue n bumboori, mɔne cεen n naaso sanga, na Yesu susufɔm woori soɔ be nu, na ba tu anɔ n ago bu ηu, dama bu soroori Yudafo nkpien-kpienm wɔ. Na Yesu aba ajina bu aƒien ase bu ka, “Am ma am ahore da.” ²⁰ I seeri so wieeri ni, na wɔ fa i saam deke bo bu boori i bulaari ni, ni i nvin deke bo bu wɔɔri i kpiε n akere bu. I susufɔm ηuuri i so ni, na bu ahore ajo. ²¹ Na wɔ kaaki ase bu ka, “Am ma am ahore da, kabo m Si sunmaari m ni, so ye mini gusu susunma am a.” ²² I seeri so wieeri ni, na wɔ yi i ηumi ago bu ηu, na wɔ se bu ka, “Am de Nyeme Awiewie Casi ni. ²³ Soɔo kεrε bo am faari i satie ceeri i, Nyeme fá i satie ce i. Ama, soɔo kεrε bo am fa má i satie ce má i, Nyeme fá má i satie ce má i.”

Kabo Yesu yiiri i ηu kereeri Tomasi ni

²⁴ Sanga bo Yesu yiiri i ηu kereeri i susufɔm buru ni nnyɔm ni, bu nu kun awo má bu nu. Yiri la Tomasi bo bu fere i ka Ndaa ni. ²⁵ I ba baari ni, na ba se i ka, “Ya ηu Mibiε ni.” Na wɔ se bu ka, “Má ka ma ηu i saa kunma n bo bu kpamaari i ni, na m fa m saa maraka wura nu, na m fa m saa wura i nvin nu deke bo bu wɔɔri i kpiε ni, m yó má yarada fieo.”

²⁶ Na i lemɔcue cεen, na ba wo soɔ n nu bekun. Nyini cεen ni, Tomasi gusu woori bu nu, na ba yandi atu anɔ ni. Na Yesu aba ajina bu nu, na wɔ se bu ka, “Am ma am ahore da.” ²⁷ Na wɔ se Tomasi ka, “Fa u saa maraka ba wura m saa

kunma n nu, na a fa u saa ba wura m nvin kunma n nu. Na a yaki sika na a yo yarada.”
²⁸ Na Tomasi ase i ka, “Woro ti m Mibiε, ni m Nyeme a.”
²⁹ Na Yesu ase i ka, “Bo a nju m ti ye a yo yarada? Terefiε wo bu do, bo bu nya nju ma m na bu yo yarada ni.”

Deke bo i ti na bu kereeri ahin kadasi n ni

³⁰ Yesu yo yoori alekutura sam beberebe na i susufom n anju i, ama, ba kere ma i kere awura ma ahin kadasi n nu. ³¹ Ama, ba kere ahinm ni, adena am yo yarada ka Yesu Nyeme Wa ni ti Kristo n a, Tiidefo n bo Nyeme ase ka i sunma i ni, na am yarada ni ma am nya ngoo i dee duma n nu.

21

Kabo Yesu yiiri i nju kereeri i susufom n bekun ni

¹ Nyini sin, na Yesu ayi i nju akere i susufom n bekun kunma kpiri n bo bu fere i ka Tiberiya n noo su. Kabo i faari i nju kereeri bu n la ka, ² i susufo nbem atien bu noo, bere la Simon Peto, ni Tomasi n bo bu fere i ka Ndaa ni, ni Natanieli n bo i fite Kana bo i wo Galili asien n su ni, ni Zebedi nbaa nnyom ni, ni i susufo nnyo nbem. ³ Na Simon Peto ase bu ka, “M sukoo jombaa tara lee.” Na ba se i ka, “Yere mmoo su u su koo.” Na ba wura lee n nu akoo, bu woori nzue n nu haari ale koo sucin, ba nya koro tara ma pui.

⁴ Sangga bo ale ba ciinri wein ni, na Yesu aba ajina kunma n noo su, ama, i susufom n asi ma ka yiri lee. ⁵ Na wo bisa bu ka, “M nbaam, am anya ma jombaa, ma so?” Na ba se i ka, “Ai, ya nya

má be.” ⁶ Na wɔ se bu ka, “Am sandi am diendie n lee n fɔmbɔɔ su dɛɛ bue ni, am nyá be.” Bu sandiiri ni, na ba tara jombaa beberebe, haari ba koro ama má diendie n su. ⁷ Na Yesu susufɔ n bo i koro i agaya n ase Petoro ka, “Ya Mibiɛ lɛɛ.” Deke bo Petoro tiiri ka, bu Mibiɛ lɛɛ ni, nyini sanɔa i jina i ŋuniɛ ŋgbɛɛn wɔ. Na wɔ yo ndende afa i tanlɛɛ abo i wi nu, na wɔ ti ato nzue n nu. ⁸ Ama, na i beŋgu susufɔm n bo bu wo lee n nu ni, sucin diendie n bo wɔ yi ni jombaa ni, na bu fa ba kunma n nɔɔ su ni. Deke bo bu wo n ni kunma n nɔɔ su n waari má, i tiiri ajaari natiwa yaa kun wɔ.

⁹ Bu cin kɔ juuri kunma n nɔɔ su ni, na bu fiteeri lee n nu ni, bu ŋuuri ka sinmɔne da, jombaa nana su, kɔɔnɔ da bere. ¹⁰ Na Yesu ase bu ka, “Am fa jombaa n bo am atara bu kisa n be bra.” ¹¹ Na Simon Petoro awura lee n nu, na wɔ cin diendie n bo wɔ yi ni jombaa ŋgbingbiri n aba ahɛmɛ. Jombaa n kɛɛ kɔ yasuuri yaa ni aburunu ni nsan a, ama, haari ni nyini jombaa beberebe n kɛɛ, diendie n ati má. ¹² Na Yesu ase i susufɔm n ka, “Am ba yo daraka.” Bu be abo má su, na i bisa i ka, “Wɔɔ ŋma?” dama bu kɛɛ si ka bu Mibiɛ n a. ¹³ Na Yesu aba afa kɔɔnɔ n ama bu, na wɔ fa jombaa n gusu abuka bu su. ¹⁴ Ahin yoori kpe nsan su, bo i yiiri i ŋu kereeri i susufɔm n a, sanɔa bo i tengeeri i yiwee n nu ni.

Kabo Yesu ni Petoro boori anzama ni

¹⁵ Bu yoori daraka n wieeri ni, na Yesu abisa Simon Petoro ka, “Yohane wa Simon, a koro m tara kabo nyiŋgam ni koro m ni?” Na wɔ se i

ka, “Ἐν, m Mibiε, wɔɔ mmɔɔ si ka m koro u.” Na Yesu ase i ka, “Niε m nbɔmbaam dika.” ¹⁶ Na wɔ kaaki abisa i kpe nnyɔ su ka, “Yohane wa Simon, a koro m?” Na Petoro ase i ka, “Ἐν, m Mibiε, wɔɔ mmɔɔ si ka m koro u.” Na Yesu ase i ka, “Niε m nbɔem dika.” ¹⁷ Na wɔ kaaki abisa i kpe nsan su ka, “Yohane wa Simon, a koro m?” Na Petoro ahore asaaki kabo wɔ bisa i kpe nsan su kere ka, i koro i ni? Na Petoro ase i ka, “M Mibiε, wɔɔ si deke n kere a, a si ka m koro u.” Na Yesu ase i ka, “Niε m nbɔem dika. ¹⁸ Nahɔre ye m suse u n a, ka sanɔa bo a yo ti gbefene ni, wɔɔ mmɔɔ ni u tii bo u wi nu kujara kɔ deke kere bo a koro a, ama, a ba yoori kpɛn, a yε u saa su anɔoro wɔ, na be bɔ u kujara na i fɔ u kɔ deke bo a koro mɔ ni.” ¹⁹ I seeri sɔ n na i kere kabo Petoro bɔ wu barasu, na minem nɔ kabo Nyeme jirima woowa n ti barasu. Nyini sin na wɔ se Petoro ka, “Su m su.”

Yesu ni i susufɔ n bo i koroori i agaya n jɔre

²⁰ Na Petoro akaaki anie anu ka bere susufɔm nu kun bo Yesu koro i agaya n su bu su. Yiri la bo bu yo sudi diire na i tana mataari Yesu na i bisaari i ka, “M Mibiε, nma tɔ u n a?” ²¹ Petoro nɔuri ka i su bu su sɔ ni, na wɔ bisa Yesu ka, “M Mibiε, ye ahin n gusu di?” ²² Na Yesu ase i ka, “Nzen m koro ka i wo bere haari sanɔa bo m bɔ kaaki ba, i nya u se? Wɔɔ su m su.” ²³ I seeri sɔ n na labari n abara aye i susufɔm dɔ, ka i nyini susufɔ ni wu mɔ. Yesu ase mɔ ka i wu mɔ, ama, i nɔ, “Nzen m koro ka i wo bere haari sanɔa bo m bɔ kaaki ba, i nya u se?”

²⁴ Nyini Yesu susufɔ ni diiri ahin jɔrɛm kɛrɛ daani a, yiri kaaki kɛrɛeri ahin jɔrɛm kɛrɛ a, na ya si ka i daani diiwa n ti nahɔrɛ n a. ²⁵ Yesu yo yoori sam dɔŋgu, bo má bu ɲa bu kɛrɛ i kɛrɛ, ma de má ka bu nyá fofoe durunya n nu, bo bu fá nyini kadasim n kɛrɛ fa se.

ΝΥΣΜΕ ΙΟΥΕ ΚΑΔΑΣΙ
The New Testament in Anufo (Chokosi)

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022

fe36d0e6-2a60-5e15-8d1c-8bf275389598